

ASO LUA, 21 SETEMA 2021

Na toe faaauau Taualumaga a le Fono Aoao Faitulafono i le itula e 1:55 i le afiafi.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2021/2022.

FOFOGA FETALAI: Ou te faasilasila atu ua toe amatalia nei Taualumaga o le Fono Aoao Faitulafono.

Ia e fai le tatou malologa o saunoa le sui mamalu o Faleata Nu 3. O le mea lea, o le taimi lenei e faaauau mai lau saunoaga. O lea foi e matau atu e pei ua faiuu mai le saunoaga.

Tulai mai le sui usufono mo Faleata 3.

Tofa LEALAI PULE RIMONI AIAFI: E momoli le faafetai i lau Afioga i le Fofoga Fetalai mo le tatou tausiga o le aoauli. Ua maua foi le malosi e toe faaauau ai la tatou galuega. E faafetai le tausii mamalu i o tatou Palemene.

E talitonu o lea e fai le tatou malologa o ou i le afioga i le Minisita o Leoleo. E le toe oo foi se tala i ai lau Afioga. O le auga atoa..

Afioga Toeolesulusulu Cedric Pose Salesa Schuster (Aana Alofi 3): Lau Afioga i le Fofoga Fetalai, o se mataupu e fia faamalamalama.

FOFOGA FETALAI: Saunoa mai.

Afioga Toeolesulusulu Cedric Pose Salesa Schuster: E faafetai i lau Afioga i le Fofoga Fetalai. E faamalie atu foi i le Afioga i le sui usufono mo Aleipata Nu 3, ona e tautuauega se manatu, ae leaga o lea na laga i lana lauga se vaega o lenei itumalo e tusa ai foi ma le tatalaina o auala ma vaega ia sa faapena ona taua i saunoaga.

Lau Afioga i le Fofoga Fetalai, atonu e taua foi le vaega lea na saunoa i ai le susuga i le sui usufono. O le tasi lenei o vaega na agai foi i ai lau tautalaga lau afioga. E moni ua faatino le suavai ma auala i nisi o vaega o si o matou itumalo. Lau afioga i le Fofoga Fetalai, o nei po o ua fitu (7) masina talu ona fai le tatalaina o le suavai, e le o ola lava. E le o ola le pamu. E le o uma ona fai ia paipa e sua ai le suavai. E oo mai foi i le taimi lenei, ua lata i le fa (4) tausaga talu ona faatino le galuega o le

fanaua o si o latou aiga. E le i totogiina lava le lisi. E lei totogiina foi laau sa faalalo a le aiga, talu le amataga o lea galuega. O le auala foi lea e taua ua faatino, lau Afioga e faatolu (3) nei, o taimi uma lava e timuga ai ma malepe le auala.

E avatu ai le tuualalo, atonu o lea ua i ai le afioga i le Minisita, a maua se avanoa ona matou asiasi lea i ai. O le atugaluga lea lau afioga, ina ia faalelei le faatinoga o konekarate e faatinoina auala.

E faafetai atu foi i le afioga i le Palemia ma le Kapeneta, ona ua ae se tofa, ona e tasi foi lenei, le tatalaina o le auala lea. O le tele o le vaega sa faatinoina e le afioaga ma le itumalo i le faatinoina, ua oo atu foi i le Malo, a o lea ua matau atu ua i ai le fanoga o le Afioga i le Palemia ma le Kapeneta, ua lava lava le Minisita e o i le tatalaina o auala, faafetai.

FOFOGA FETALAI: Ia faafetai, o lona uiga o lea e lagolago mai e le sui usufono lea ia le saunoaga.

Ia saunoa mai le sui mamalu o Faleata 3.

Tofa LEALAILEPULE RIMONI AIAFI: Ia faafetai foi i si ou uso, a ou matau nei, i nai ou uso ia i le Tautua e lagolago mai. E faafetai foi i le afioga a sui matua o le Tautua lau Afioga i le Fofoga Fetalai.

E faapena le aluga o le olaga lea tatou te i ai. Aua tou te fai mea ita. Faafetai Toeolesulusulu. O lea o le a ou valaau ia Olo e fai le mea lena e te finagalo i ai. E leai e manaia lava le fai o sina malologa.

O le aotelega o lau faamatalaga lau afioga, e le i tuuaia si ou uso a Minisita, manuia ou faiva tulai mai. O lea lava na faamaonia lau tala, e leai e sese tala na aumai.

Lau Afioga a maua i faamaumauga o lau faamatalaga. Na amata lau tala e faapea, o le ma aiga, e faasa ona talanoa ai polokiki e faasa. Pe faaselau ona ma fetau i le tausaga e sa, e fai lona finagalo fai lou loto. E le aiaina e au ia, e le taitai foi faapea mai o lea ou te i ma a ma a, e leai. O le uiga lena o le tala.

Ae a tuu i le aotelega, o ai outou o ai matou. Se alafalafa tuna ma tala le gafa o tatou uma lava o le aiga. O le tulaga faigata lena o polokiki a Samoa. Ae ui i lea, o le a le toe oo i sea tulaga. O le tuualalo ona o le aso lea, e pau lava lea, e pei ona ou talanoa i le amataga o le faavae o tatou. E faavae i le kerisiano ma le alofa.

E pau lava lea o le mea o nai faifeau, aemaise o lau faifeau. Na sau faapitoa, aua na valaau atu le Ofisa o le Fono, e na o le taitoalima lava le auvalaaulia. Ua ou fai atu i si ou toalua, ua lava oe ma tamaiti e toa lua ma le tatou faifeau ma lona faletua leaga o lea na o le toalima (5) e faataga mai. Aepeitai ane ua oo mai lau faifeau, ae toe faafoi.

Lau Afioga i le Minisita, o faifeau i lou talitonuga e leai se tulafono, e le taofia e tatou le faifeau. E po o fea lava e alu i ai le faifeau i totonu o Samoa, e saoloto. Na o le tuualalo lava i le Matagaluega o Leoleo e le taua ai se tulafono i le mea lea.

E leaga o le faifeau, o le feau o le filemu. E pau lea o le mea lau Afioga se i tagai ane i le vaega lea. E leaga na oo mail au faifeau i le aso lea, ma nai faifeau uma lava. O ai lava le faifeau, e leai o le tatou faaaloalo lenei ma ave i ai la tatou faamuamua, ma le faaaloalo. I leoleo ia tautuana ma i latou.

O le isi mea lau Afioga, e faafetai atu, e fafetai atu i le faaauau o le auaunaga i le Taitai o lenei Vaega Faaupufai o le tama ua leva ona tautua i le tatou Atunuu. O le tatalo, faaauau ai pea.

E le gata o lea, lau Afioga i le Minisita o tupe, o lea ou te manatua sa fai le taavale a Palusalua i le taimi o matou i i, o lenei e silafia e le Afioga i le Fofoga Fetalai ma matou sa i ai i lea taimi. Sa fai le taavale a le Taitai a le Itu Agai, e le o se mea fou, ae na ona toe faamanatu i lau afioga ma lenei Itu, le tulaga lea. O le mea masani o le mea na sau ai, le va nonofo ai ma le va fealoaloai o le Palemene o Samoa, e avatu ai le tuualalo.

A o le tulaga lava ia i le aoatetelega o lenei amataga lau Afioga i le Fofoga Fetalai, e le i tutupu fua mea faapenei. E ao ona tupu le tatou taimi, ina ia aua ne i toe tupu i le lumanai. Amuia foi tatou, e i ai nisi o tatou o lo o faapea, ua fetui le matou omai ma nei faigata ma nei luitau, a na iloa matou te le omai i nei taimi.

A o lau tala, faafetai ua filifilia tatou i lenei taimi. E le fesiligia e tatou le finagalo o le Atua. A ia maua so tatou ai, ina ia aua ne i toe tupu i le lumanai, ma ia aoga mo tatou tama fanau.

Lau Afioga i le Fofoga Fetalai, manuia lou tulai mai, e le tau selu atu. E mai lava i le aso muamua i lau tatalo na matou faalogologo mai ai i lalo o le ulu. Sa e tatalo lava ma talosia matou. E le o se upu e avane ai, ina ua fai foi le lafo i le quorum, faapea e 23. A o lea ua ou faalogologo atu, e leai o lea e tau ai ma tatou. Na ou toe lototele ai lava, e leai o lea lava e faataataa tatou e si toeaina ae tatou te oo atu lava i totonu.

Ae faafetai, o lea na maua ai le lototele, i lou finagalo ma lau tatalo i lea aso. E pau lava lea, o le tulaga mamalu o le tatou Palemene ia tautuana ma lau afioga. Faafetai i lou tulai mai, ia manuia lou alofaiva.

Lau Afioga i le Palemia ma le paia o lenei Itu, o lenei. Ua saunoa manino le Taitai o lenei Itu, le Malo lenei. Le Malo lenei, alo ane i outou faiva. E pau lava lea o le tuualalo. A outou mulimulitai lava i faiga faavae, o lenei tou te silafia e le tau fai atu. E tasi lava le autu ia manuia Samoa.

O galuega ua faatino, aualatetele auala televavave, fesootaiga ma mea uma, malaevaalele e le tau faalaulauina. O le aveeseina e le Atua o ni tatou mea e fai, leaga o le tatou galuega lenei na o tatou omai ai. O le galuega lenei na o tatou omai ai. O a foi ni upu ua lafo, i lea vaiata na tatou savavali mai ai, ia malu ave i fale i outou finagalo. O le sailigamalo e faapea ona fai. Avea foi le naunau e galo ai le vafealoai. O upu soona fai, toe faafoi mai. Ae tatou savavali faatasi ia manuia Samoa.

Lau Afioga i le Taitai o le Itu Agai, Tuilaepa, faamalo faafetai lou lototele. O lou alofa ia Samoa. A tatou talanoa i galuega e le taufaalauina, e tautatala galuega. A tatou talanoa foi i lou faamaoni, e le tau laugaina. E silafia e Samoa ma le Atua. O le a lau tala i le tatou Vaega Faaupufai, e faafetai ua tupu, tupu i le taimi lenei. E leai se isi taimi e tatau ona tupu, e tupu o lea e te i ai.

Ua maea lena 40 tausaga, tatou agai i le isi 40 tausaga o i luma. It's a new beginning. Faafetai i lou lototele. I lau Afioga i le sui Taitai ma le tatou Vaega Faaupufai, aua ne i galo Samoa, tatou tutu faatasi e manuia ai. Aua foi tatou te sailiili masei, aua le faasinosino lima. O tala a Leala e fai i totonu iinei i le Palemene, e fai foi i fafo po o fea lava e i ai. E le ese sau tala i fafo, ese sau tala i inei. O lau tala e avatu o au lea, o lou agaga faamaoni.

Le paia i lo tatou itumalo, e leai, faafetai tele i la outou faaaloalo, o au le isi sui usufono e le i i ai se palota na faia. O lea faafetai tele, i lo outou agalelei ma lo outou manatu i lenei sui usufono. O le a ou galue foi i mea uma e oo i ai le malosi aua le tautuaina o lo tatou itumalo. E le faapea na o le nuu mavae, o Samoa atoa o i ai, e lavea atu ai ma le faipule o Vaele la e nofo i o, ma isi faipule la e i o. E lavea atu ai lava ma outou ia te au, ou te le faapito ia te outou. O le a le mea tou te finagalo ai, o lena tou te silafia le mea ou te nofo ai. E pau o le mea e ta loa le 6:00 i le afiafi ou moe loa.

Nai ou matua, si ou tama matua o tapuai mai, Aiafi malo faafetai i lau tatalo tama. Papa ua alu mama a o lo o e talotalo mai lava mo si ou atalii. Aemaise o si ou tina matua ia Kesa ua 89 tausaga, ia faafetai i le lua tapuaiga. Nai ou aiga nai ou tuafafine ma nai ou uso, malo faafetai. Faafetai i lo outou manatu mai.

E tiga ona leai sou pay, ae ou te alu atu lava i le bank account ua alu i luga i lo outou alolofa mai. Aua tou te toe faamoemoe mai. O le totogi o lea ua saunoa le Fofoga Fetalai, faatoa maua ia Tesema. O lona uiga e toe tolu (3) masina lea tou te toe alolofa mai ai pea, lafolafola mai pea nai tupe aua le Itumalo ma au.

E faaiu se faamatalaga, e faaiu i si ou toalua ma si au fanau. E tasi nei tagata, o tatou uma, o outou faletua o matou taitoalua ma matou fanau. You are the silent victims. O latou nei o lea e afaina i nei mea. E fai o tatou, ae afaina nai taitoalua ma fanau, o maaveave le fua. Ae faamalo i lo outou lototetele ma le tou onosai. E faamalo i si ou toalua ma si au fanau, ia onosai, onosai ma tatalo i le Alii ia maua le loto faamagalalo. Ia faamanuia le Atua, faafetai i lo outou alolofa ma lo outou lagolago mai.

Ona faaiu lea o sau faamatalaga, le uso ia Tiatia ma le...lau Afioga e pau o le mea o le faamalo i ai i le latou tautua. Le afioga ia Malielegaoi Mareva ma i latou uma ia sa tatou galulue, ia lototetele, lototetele. Ia faamanuia le Atua, faafetai i la outou tautua. Ia tatou onosai, maua le loto faamagalalo ma tatou tatalo ma tuli i luma so tatou ai.

I latou uma foi o lo o alolofa mai i le tatou tipoti koko, ia faaauau pea, o lena ua outou faafofoga i ai e tiga lo ta mai, e tiga le leaga o lo ta leo,

ae ua faapese lava ta ita i Aso Toonai uma, e faafiafia outou, ma faafiafia uma tatou.

Le Atua, tumau au faamanuiaga tumau lou filemu ma lou agalelei i luga o Samoa. Ia faamanuia le la itu i le Afioga i le Palemia ma le sui Palemia ma le paia o le la Itu, faamanuia lenei Itu i le Taitai ma le sui Taitai ma sui mamalu. A ia sili se faamanuiaga i le Fofoga Fetalai ma le aufaigaluega.

Samoa ua potopoto ma le aufaigaluega a le Malo, ia faapena ona i ai manu o Samoa. Ua foi se upu, tofa soifua.

Na faaalua le agaga fiafia o le Maota i le patipati o latou aao i le maea ai o le Saunoaga a le sui usufono mo Faleata 3.

FOFOGA FETALAI: Ua faamalo saunoa, faafetai foi tanoa i lau Afioga i le sui mamalu o Faleata Nu 3. O lea la ua ou iloa nei, o oe le isi tama matua o le Maota, o lea ua amata ona e tofa faatagata matua.

O lea ua matou faalogologo ma le totoa, o le a le toe pese i fafo a o lea ua e pese lava na o totonu o le Maota, aua lava le manuia o le Atunuu.

O le mea lea malo saunoa, faafetai foi ma faasoa ma tuualalo fesoasoani foi i le Faigamalo, aua lava le manuia auiluma o le atunuu atoa. Ua le faapito lava Manu ia Tasi i lou itumalo, ae o lea lava ua e talatalanoa aua le Atunuu atoa. O le mea lea e faafetai i sui mamalu mo le faasoa. O lea foi ua lagonaina lou lagolago aemaise foi o lou tuualalo aua le manuia o lou atunuu. Malo saunoa faafetai tapena.

Ia o le avanoa lenei o se tasi o sui mamalu o le Palemene.

Ua ou vaai atu o lea ua fou mai le sa o le Afioga ia Hon Loau Solamalemalo Keneti Sio mai le itumalo o Sagaga Nu 1.

Le sui mamalu, e tasi lea tama matua o le Maota. O lou taimi lenei e te saunoa ai.

Afioga Hon LOAU SOLAMALEMALO KENETI SIO (Sagaga Nu 1): Ua maua se avanoa lau Afioga i le Fofoga Fetalai, e fai ai se sao o manuvao aua foi le Tala o le Tupe ua faapena ona faataatia mai i le Maota.

A o le i faia se tala, e lagona le agaga o le faafetai ma le meeme. O le itula foi o le aso ua faapena ona mou malie atu le taeao, aua foi le fitaituga o tiute ma faiva lau Afioga i le Fofoga Fetalai. Ua maua foi le faasiligamalosi i le taliga o le sua i le paia o le Palemene nei i ona tulaga faalupe.

I le la Itu o le Malu i le afio mai o le Palemia ma lona auvaa. Lenei foi tala na atoa i le susu atu o le susuga i le Taitai ma le loaloa o lenei Vaega Faaupufai.

Ae ou te avea lenei taimi faaauuro, ua maua ai se avanoa lau Afioga i le Fofoga Fetalai, e faatalofa atu ai. Ou te manatu foi o lea ua maea ona paelago paia sa ma faiga o lenei aso. E mai lava i le taeao seia paia lenei itula o le aso.

Ua maua foi le faasiligamalosī. E matau atu foi i lena itu, ne i tele naua se faamatalaga ae avea ma se mea e tofafa ai lo tatou Maota. Ona ua uma ona tali le sua. E silafia foi, o le matai Samoa lava ia, a maea ona tali le sua, o le mea lona lua o le taoto loa i lalo. E fai se faigamalologa. Ui i lea, leaga o lea ua faapena ona faaauau tiute.

Paia la sa ma faiga o le Maota nei, e pei o le Maota na i Amoa e laiuula ae pou i toa. Aua ua mamalu ma paia le Maota nei, i ona tulaga faalupe, sui usufono filifilia na faapena ona faia mai i fuifui, tatou te lipoiina upu ma tonu fai a si o tatou Atunuu.

E faatalofa atu ma ofoalofa atu i lena Itu o le Maota. Aemaise foi le afifio o Ofisa Sili o Pulega o Matagaluega e faapena ona tatou faatasi i lenei aso. Malo le soifua ailao ua maua.

Ua tulai lava ma le ava tele ma le faaaloalo lau Afioga i le Fofoga Fetalai, e fai se leo ma se sao o lenei itumalo. E to manatu lava i le taimi ua sola e fia oo lava i ai se tala lau Afioga i le Fofoga Fetalai.

O le aso 4 o Aperila na faataunuaina ai le tatou faiga palota. Peitai ane o lea ua oo mai ia Setema i le aso 9, o lea faatoa faapena ona fono le tatou Palemene. Ona o le tele o nisi o gaogaosa ua le ogatasi foi le futia ma umele. Ua fetuunai solo muniao, ina ia tonu ma sao atoatoa lea ua tatou lipoi i le Maota nei aua upufai a si o tatou Malo. Ia malo foi le faatoatoa i lau Afioga.

E tele tala ae ou te manatu o le a ou le manatu i lea tulaga. Ou te le talatala foi ni tala e oo mai, ua faapena ona le atoatoa i ai se finauga. Ae o le auga o lou tu, ou te faafetai ai i le Atua, ua mafai ona ou tulai atu i lenei itula. Aua o le upu moni lau Afioga i le Fofoga Fetalai, o au le isi sui e matautia le mea na oo i ai pe a ou toe to manatu i tua. Ae lei faia le tatou palota, o au lava le sui na ou faalogo fai mai e leai sau palota e faia. Ona faasolosolo mai ai lava lea ma iu ina fai le palota. Na sosoo ai ma le fai o lou faamasinoga. E pei o foliga ia ua ou manatu ai, faafetai i le Atua i Lona alofa ma Lona agalelei ua mafai ai ona ou toe tulai atu.

E faia lou tagata faatauvaa ma fofoga taumolimoli o le paia o si ou itumalo i ona tulaga faalupe. E le gata la ua uma le faamasinoga, aua o au lava le faamasinoga mulimuli lau Afioga i le Fofoga Fetalai. A ua ou toe faalogo foi i le isi iuleo o le a matou o i tua, e le i faatautoina i matou. Ua atili mamafa ai le avega lau Afioga. O le agaga lea, e faaataata lafoga i le tulaga o le tatou mafutaga, ae mafatia le loto aemaise o le tapuaiga a si ou itumalo i ona tulaga. O le agaga faafetai lena.

O paia la sa ma faiga ou te manatu o lea ua uma ona paelago. O nisi foi o tootooau o lo tatou atunuu sa faapena ona lipoiina upu o lenei taeao. Mai le aso ananafi seia paia sa ma faiga e le avea lau Afioga. A ia tumau e oo i le faavavau. O le agaga meemee lea o lenei taeao.

O le a ou le toe ta i tua le tili pe ou te toe lotea le lauti fatualalo lau afioga. Ne i umi se faamatalaga ona toso lea o le laau felefele. Ae o le auga o aute o lenei aso, sei o tatou lipoi ia le tusi paia paepae lea. O le Tala Faatatau autu o le tupe 2021/2022. Aua le faafofogaaga a lo tatou

Atunuu, ua faapena ona tapuaia o tatou faiva, tui mai le mulipapaga, po le fala ma feula le mulila. Ina ia faapena ona tini tau lau o le faamoemoe, ma ia aveaveai le tatou galuega ina ia tatou galulue faatasi.

O auga na o aute ua ou tulai atu ai lau afioga. O se taimi ona ou oo lea i le tapuaiga a si ou itumalo. Aua le latou faafogafoga tapuai mai.

Ou te manatu foi, ua tea i tua Apolima, o a nisi o futia sa faapena ona tatou laasia ma alo ai lo tatou sa, ae tupu pea le loto e mama, ona fai mai, faamagalo ae le galo, i lau lea matau. Tou te faamagalo matou ae le galo foi. Matou te faamagalo lena itu, ae le galo mea na tutupu. O sou lea lagona.

Ou te ata lava ma ou toe mafaufau i le aso Lua lea na faapena ona tauaofia ai le Fono. O au la o la ou te sau i lau taavale, ou te sau i le Fono lau afioga i le Fofoga Fetalai, pe a tusa ai ma le faamoemoe o au o le sui usufono o le matou itumalo. Ae ou sau ae taofi au e alii mamalu o le Malo, ma faapea mai. Malie lau afioga Loau, e le mafai ona e alu i le Fono, ona o lea e i ai le poloaiga e le i faatautoina oe. Ona ou tago loa lea laga ae i luga le iuga o lou faamasinoga. Fai atu, a outou silasila a outou afioga i malu o le Malo, o le iuga o lau faamasinoga lea e fai mai. Ua faatumaui nei ona umia e Loau Solamalemalo Keneti Sio, le Nofoa o le itumalo Sagaga Nu 1. O le iuga o le faaamasinoga. Ae fai mai le malu o le Malo, ia uuuu ai pea faapena le iuga o lau faamasinoga, ae e le mafai ona e alu. Ona ou fai atu lea, ua lelei o le a usitaia le tulafono e tusa ai ma la outou fanoga. Ou nofonono ifo ai lava lea i lalo o le aualatele. Ou te le i nofo i lalo o le ulu, ou saofai lelei ai i ina ma ou matamata mai i le matagofie o le Fale Fono o si o tatou Atunuu, ae ua le mafai ona ou sau i ai.

Ae ui i lea, e pei o mea ia ou te nofo ma ou mafaufau i ai.

FOFOGA FETALAI: Ioe, e fesoasoani atu i le sui mamalu. A e toe talanoa loa i ina, e iu ina tagi atu ai ma le Nofoa i lou talanoa i ai, ia malie ia lou finagalo ua tuanai na aso

Afioga Hon LOAU SOLAMALEMALO KENETI SIO: O ni mafaufau ua oo i ai...

FOFOGA FETALAI: Se i fai mai sina au koma se i tulai mai le Afioga i le Palemia. Saunoa mai.

Afioga Hon Fiafame Naomi Mataafa: Na o lou fia pai atu lava ma le faaaloalo, i le sui o lo o saunoa. E tutusa lelei lava o ma lagona, i lona mafatia i le matamata mai i le Maota, i le aso 15 o Setema. E faapena foi matou i le aso 24 Me, na matou matamata mai i lumafale o loka atu le Maota. E tutusa lelei lava ia lagona.

FOFOGA FETALAI: O oe foi o le toaina matua o le Maota, o lea foi ua saunoa malamalama le Palemia, o foliga ia. Ae manatu se tatou

faatea ia mea i nuu le aina, tatou alo i luma lo tatou sa. Tatou lagona uma ia tulaga. O le mea lea, faamalulu atu i le sui mamalu, faasee ese ma lea vaega ae faaauau le saunoaga aua le Atunuu.

Afioga Hon LOAU SOLAMALEMALO KENETI SIO: Faafetai, o le a ou le toe taua lea tulaga. E tele le eseesega, ae o le a ou le toe taua.

Lau Afioga i le Fofoga Fetalai, ua tele tala ua alu, a o lea ou te tilotilo atu i le tusi pitosili lea ona taua o le Tala o le tupe, e leai lava ni mea tele o i ai. E na o ni nai fesuiaga laiti lava, i le tilotilo foi a le la itu, a o le tala masani lava, o lea ua sefulu tausaga talu ona ou faipule, o foliga vaaia lava ia.

E talu ai lau Afioga i le Fofoga Fetalai, ma tala sala tua ma mea ua oo mai ia te au. E ao ona ou faaalua, leaga o la e faalogologo mai ma faafogoga mai si ou itumalo. O le tala lea na aveina ananafi, e fai mai o le miliona ea? E tatau ona oo i ai sau tala leaga o la e faafogafoga mai si ou itumalo.

O ananafi lau Afioga i le Fofoga Fetalai, ae ou te le i usu mai i le fonu. E masani ona ou alu ou te savali i le taeao. Se o le malie ia lau afioga. E alu atu lau savaliga, ae matou fetau ma le solo tele lava la e sau, la e ta mai tinipalau i le auala, ta mai le apa, d..u..m d..u..m. E agai mai i le mea lea ou te agai atu ai. Ma leo lava o tagata ou te faalogo atu, miliona, miliona, miliona, miliona. Ou faapea, sole, ae e ese le mea lea. Oo tonu mai lava i ou luma ae fai mai loa ma le taitai, “eyes right” ia tutu loa. Ou vaai atu, sole o le matou aufaipinati, ma le aufaifaatoaga a si o matou itumalo. Fai mai, Loau, o le taeao leni o le a tanumai ai uma a matou suotosina, o piki, o rakes, matou te le toe o e fai se pinati. Aisea le mea ua tupu? O le taeao leni o la e talanoa ai e le Palemene le Tala o le Tupe e tufa mai ai le miliona a le itumalo. Ou fai atu, a, se ou te le iloa la e au le mea lena. Ae o lau fautuaga ia te outou, e lelei ona outou tuutuulua.

Tofa Hon Olo Fiti Afoa Vaai: Lau Afioga i le Fofoga Fetalai, o se mea e fia faamalamalama...

FOFOGA FETALAI: Ia, sina malologa laitiiti le sui usufono mamau se i tuu atu le avanoa ia Olo. Lau Afioga i le Minisita.

Tofa Hon Olo Fiti Afoa Vaai: Faafetai i lau Afioga i le Minisita ua maua so matou avanoa i si mea e fia faamalamalama, ina ne i tatou seetia i le malu o le tai taeao i le siufogoga o le Afioga i le sui usufono. E manatua foi lau Afioga, e manino lava Tulafono Tumau a le Maota i finagalo faaalua o mea sao.

O lea la ou te faamanatu atu i lau Afioga i le Fofoga Fetalai, e le o sao ia faataitaiga e aumai i totonu o le tatou Maota ona o faamaumauga o le tatou Fonu. O le tala atu lena, aua e pei o se tala malie foi lea, ae faauigalua le saunoaga a le Afioga i le sui usufono. Ma le faaaloalo.

FOFOGA FETALAI: Ia, ou te iloa o lea ua aumai foi le fesoasoani a le Minisita lau Afioga. O lea ua taua o le sailiga o mea moni ona o le Maota, ae ou te talitonu foi, o le auga lava o le miliona. Ae ou te talitonu o lea ua manino le faamalamalama a se tasi foi o vaega o le faigamalo, ae le i saunoa le Minisita, aua o le atoaga lava o le Minisita. Ia a o le mea sili ona manino i le Maota, o lea ua manino, e leai e le tufaina ae faagaoioi ai poloketi a afioaga ae faatino e le Matagaluega o Tupe. Ia se i vaai i le manino o le tali, e le o ni tufagatupe. O lea e faafogafoga le atunuu.

Se i tulai mai lau Afioga i le Minisita.

Susuga Hon Laauli Leuatea Polataivao Fosi: Lau Afioga i le Fofoga Fetalai, o si mea laitiiti lava, o si mea laitiiti lava.

O le mea sili ma le taua o lea ua faafogafoga mai outou itumalo, tou te le manaomia le miliona. Ioe. O le itu taua lena. O lea e faapea mai, na alu le taeao lenei o faapea mai, aua ne i aumaia leaga o le a le toe galulue ai tagata. O le mau lena o lea na momoli, pe toatolu pe toafa outou lea na ou maitaua, o lea foi la ua toe saunoa le tofa ia Loau. E le o le agaga lena. O le poloketi muamua lenei o le a faatulaga e le Malo se tupe e ave sao lava i lima o tagata, tagata e ona mea. The people that owns the government, taimi muamua. Sa le faia i le 40 tausaga talu ai. A o le taimi lea o le a faaagaaga le miliona e fai ai le tofa a le itumalo. Loau, o le agaga lena, a o lea e fai mai nei o le a tiai suotosina ma le toe faia le toga pinati, oka. Ia e faapena se lagona. O lona uiga ea la tou te mumusu e fai le atinae lea matou te fai atu ai? Se ou te musu e talatalapipi vaega ia leaga ou te faaaloalo i le Minisita o Tupe ma le Minisita o Tina ma Tamaitai. Ae a ou talatala atu nei le uiga o le \$200,000 lea, its just an establishment, e faatulaga ai le mea lea. A na matou le poloka i le 4 masina na outou taofiofia ai mea, na ona omai lava fai loa, e le sese lau tala. Ae leaga ua toso, toso i tou togafiti na fai. Ia lea ua le mafai ona faatino. Faatoa ono vaiaso. Loau, a na faapea e uma loa le faiga palota ua outou talia 26 ua afio mai Tuala, 25 i ina, ua uma, e fai le miliona i le tausaga lenei. Peitai, ia o le a toe fai i ni a o lea e tau fai atu le mau mea o lea e tau faaso? O le faamalamalama lena, ae faigofie Leota, aveese Sagaga 1 ma le lisi ona faigofie lea o le tatou mataupu.

FOFOGA FETALAI: Ia, ou te iloa o lea ua malamalama lea mataupu lau Afioga i le sui usufono mamalu.

Ia, saunoa mai le sui usufono.

Afioga Hon LOAU SOLAMALEMALO KENETI SIO: Ia, e leai lava se leaga o lau au faamalamalama o le taumafai atu. O lua faafogafoga mai na matou fetau i le auala ma le solo tele lea e aumai?

FOFOGA FETALAI: Se i tulai mai le Afioga i le Palemia.

Afioga Hon Fiamē Naomi Mataafa: Faamolemole lava la lau Afioga i le Fofoga Fetalai, e le i puea se live foi lele se i tatou matamata i le savali a le tou nuu?

Afioga Hon LOAU SOLAMALEMALO KENETI SIO: Ae mafai lava ona ou faatinoa atua pe a... Miliona, miliona, miliona, miliona. E mafai, e faigofie lava e le faigata tele. Aua o le omai lena. O au la, aua o lea ou te le o malamalama. Ou fai atu, e faamalulu atu i le savali. Fai mai, o lea ma te agai atu i lou maota Loau, ia e faaleo le agaga o le mea lea. Leaga o lea sa faapena. Ou fai atu, ia vaai outou, aua tou te popole, e mafai, e le se mea leaga, ou te faaleo lo outou lagona aua o lou aoga lea lau Afioga i le Fofoga Fetalai. A o lea e pei e foliga mai e aveseseina i le faalogologo mai. Laauli, e mafai ma sao le mea lea e te fai mai ai? Ia e alofa, aumai foi ma se matou miliona.

Ioe. Leaga o lea ou te fai atu o le pepa lea, e leai se mea o i ai i totonu. A faapea la o se isi po o se supplementary aua e le iloa pe te i ua fai se... Ia o lena o le a e toe aapa foi i le supplementary a. Ioe. O le agaga lena. A o la e ua faalogologo mai lou itumalo, aua o tagata uma nei, e maua le 200 ma ona tupu. Fai mai, Loau, o matou matou te le i palota ia te oe, ioe. E faamalulu atu ai ia te oe, matou te le i palota, ona la o le mea lea.

Tofa Hon Olo Fiti Afoa Vaai: Lau Afioga i le Fofoga Fetalai, e faafesili atu lava i le sui usufono, pe le o Papalii Panoa lena sa taitaia maia...

Afioga Hon LOAU SOLAMALEMALO KENETI SIO: Ioe, e i ai ma le toeaina ou te vaai atu e pei e savali pei o le savali a Papalii... O la e la ou te... Ioe, ui o lea, o le agaga lena. Ia malamalama si ou itumalo o lea sa ou faaleo lo latou lagona. Aua na ou fai atu ia i lena taeao, ua iloa le tonu, tuu loa lava i Vaitele ia Laauli, tuusao lava i le Maota o Samoa e maua ai le tali, e le maua atu ia te au le tali o le tou faamoemoe. Ioe, o lena le agaga. Ui o lea, se i tau ina... a o le faigofie ia o le tali ina ia malamalama nai toeiaina ma nai loomatutua. Na o se upu lava e faamalulu ai, e le maua i le Tala o le Tupe lea i le tausaga lenei. Ioe. Ae le iloa pe oo atu i lea tausaga ua fetuunai foi ma... a o le tausaga lenei, faalogologo mai outou, e leai se mea e maua. Ioe. Leaga o lea ua uma ona faataatia le Tala o le Tupe. Atonu pe a faapena ona taunuu i ai.

Ui i lea, o le agaga lena ua faaleo ai aua le faafofoga mai a si o tatou atunuu aua o lea foi e le po le laina o lea foi na lauga ai lena itu i nai toeiaina foi sa faapena ona latou aafia i a latou lauga. O lona uiga, o le agaga lava e tasi, a o lea la ua faamanino la e Laauli e faaagaaga ina ia tuu atu i outou lima e faatino ai galuega a le itumalo. Faafetai i le agaga.

Ia, masalo lau Afioga i le Fofoga Fetalai, e pei ona ou fai atu, o le tele lava o mea ia e i totonu i i, o mea masani lava ua tatou masani ai. E i ai nai suiga laiti, ia, sagai ane ai o le tai lau Afioga i le Minisita i ni suiga ina ia agai mo le lelei. Ia e leai se mea o i ai, ioe. I la matou lea matau, ae ona o lea e tuli le tatou taimi, ua tatau foi ona pasi le Tala o le tatou Tupe lau Afioga i le Minisita.

A o lau Afioga i le Fofoga Fetalai, ia, o le tele o lou taimi lea na ou nofonofa ai, ou te mafaufau po o le a sau upu e ave i le matou itumalo, ua uma ni au faamatalaga. O ananafi na tulai ai Olo ma talanoa mai i mea o polokalame lea e faaagaaga i le tekonolosi ma ia taua ai polokalame a le Ofisa o Aoga sa matou galulue ai. Ia e pei ona ou fai atu i lene tausaga ua tea, ia o la e ua phase out, ua out of date, ua phase out le... ae agai mai i totonu isi vaega fou o le tekonolosi. Le tatou internet, o lea foi ua toso mai le tatou cable, o mea uma lava e faaagaaga agai i ai ma ave i ai le auaunaga i aoga. I lau lea matau atu ne i te i ua aveseina le faamatalaga a le Afioga i le Minisita. O le agaga lene ua phase atu le vaega lea ae agai mai isi polokalame fou i totonu.

Ia, si ou itumalo, e le i faigofie le auala na tatou asa mai ai i lau lea matau. O tatou lava le faamasinoga mulimuli. Ioe, a ua fefefe uma e toe ave se mea i tai i le faamasinoga. E oo lava foi i le mea lea na tupu nei i le avega i le faamasinoga, ioe, ua tetemu si Vaega nei, pe faapefea ona toe ave ma le mautonu ai. A o matou sa matou faapena ona piipii faaafa le mau, ave ia i le faamasinoga. Ave ia i ai o le a le tonu e aumai, ia o lene. Ae te i ua ma talanoa ma le Afioga ia Laauli i le taeao lene ae fai mai Laauli, “E matua le mea na tupu Loau, e pei o se pa a le pomu le mea na tupu i totonu o le Palemene ina ua aumai le tala ua talia outou.” Ou fai atu, ia, atonu o le agaga lea o le Atua. Ae fai mai si ou uso ia te au, ae aua e te popole, e le toe faia se apili. Ou fai atu, “o ai lea matou te faamasino, o outou po o le Fofoga Fetalai?” Ia, ona ataata a lea o si ou uso ma...

FOFOGA FETALAI: E i ai foi le faaeteetega o lea ua i ai le faaiuga a le faamasinoga, ia o lea ua faatauto outou, o le a le mea e toe popole ai fua? Ia alo mai, alo mai laia o lea ua... ae faataatia mea ua tuana.

Afioga Hon LOAU SOLAMALEMALO KENETI SIO: Ona ataata a lea o si ou uso. Ua ou faapea ua toe aapa le Fofoga Fetalai e toe apili le faamoemoe, ae ui i lea, faafetai i lau Afioga i lou le manatu i lea tulaga.

FOFOGA FETALAI: Ia se i saunoa mai le Palemia.

Afioga Hon Fiamē Naomi Mataafa: Lau Afioga i le Fofoga Fetalai, na pau lava le mea na tau apili ai le Fofoga Fetalai, o le tou aveesea o le toafitu foi lea na outou mananao e faatauto ona ua alofa i ai le Fofoga Fetalai.

Afioga Hon LOAU SOLAMALEMALO KENETI SIO: Ia, o lea la ua sao o lea ua faamalamalama atili e le Palemia. O lona uiga e le o le faaiuga lea, o le isi vaiulu lea na tau tupu. Ae o le mea ou te tau ofo ai, o le talanoa fua e le tou vaega o le matou faamasinoga ma le Fofoga Fetalai. Ui o lea, e le afaina lea itu.

FOFOGA FETALAI: Se i saunoa mai le Minisita o le Soifua Maloloina.

Afioga Hon Valasi Luapitofanua Toogamaga Tafito Selesele (Minisita mo le Soifua Maloloina): Lau Afioga i le Fofoga Fetalai, o se mea e fia faamanino. E nofo lava ma mafaufau ma faalogologo ma le totoa. O le taua ia o saunoaga a le sui usufono. Pau lava le mea e faamanatu i le sui usufono, ou te faafetai i le faamasinoga sa latou tuuaia i mea uma lava. Faafetai i le faamasinoga. O se faaiuga alofa. Aua a silasila lau Afioga i mea na tutupu, i le 24 e le i omai, 7 aso na tuu i ai, e leai. A o le mea sili faafetai ua toe talitonu i le faamasinoga, o le Tulafono lava lea e savavali ai le FAST. Ia manuia le Fono.

FOFOGA FETALAI: Faafetai. Ia, o uiga lava ia o mea. E taua foi le faamanatu mai o le Minisita, o lea lava ua tulai mai le faamasinoga mo tatou uma. O le mea lea, see ese ia lau saunoaga ma faamasinoga ma le toe agai atu i faamasinoga lau Afioga i le sui usufono mamalu. Saunoa mai...

Afioga Hon LOAU SOLAMALEMALO KENETI SIO: Faafetai. O lea foi e faalogologo mai le paia...

Susuga Hon Laauli Leuatea Polataivao Fosi: Lau Afioga i le Fofoga Fetalai, o si mea laitiiti lava lea e le faalavelavea le...

FOFOGA FETALAI: Se i onosai laitiiti mai lava... Saunoa mai lau Afioga i le Minisita.

Susuga Hon Laauli Leuatea Polataivao Fosi: Ina ne i te i ua galo i le Afioga i le sui usufono, o lana faatoesega lava lea na toe silasila i ai le Vaega Faaupufai, ona na o Loau lava na oo atu e faalalolalo. Ioe. O le ala lea. Loau, a na leai ou fofoga e apili le case, o le upu sao lena. Ioe. A ua fai oe ma faaolataga. Na pau lava le mea na matou naunau ai, ia e alaala mai i ina e te molimau le 5 tausaga lenei, a o le isi aualii lea e le i faatoesa, o la e i ai le second round e sauna mai i ai. Ae aua ia e te toe amuamu, ua laki lau Afioga.

FOFOGA FETALAI: Ia, ou te iloa o lea ua faatea ia ia mea.

Afioga Hon LOAU SOLAMALEMALO KENETI SIO: Ia, leaga o lea o le a mamao le mea ua ta i ai le... ae ou te le iloa po o le a le mea o le a ou oo ai i lea tulaga. Ia o fea se mea e malo matou ae ou faatoese? E matua le taitai ona talafeagai i le va nonofo ai o lou malo ae alu faatoese. Ui o lea, aua ne i tatou taea lea tulaga.

Ia, ona manatu lea i le faafofogaaga a si ou itumalo, e momoli atu le agaga o le faafetai, ioe, i la outou tapuaiga leleoa ma outou po le fala ma feula le mulila, tapuai ou faiva. Ia, ua umi naua. E pei ona ou fai atu lau Afioga i le Fofoga Fetalai, o au lava le faamasinoga mulimuli. A fua la i ai, o se taimi umi sa faapena ona le mautonu ai le mafaufau.

Le paia i le aufaigaluega tofofi a le Atua lau Afioga i le Peresetene o le Ekalesia Metotisi Aoa o Samoa ma atunuu e mamao lau Afioga Faulalo faapea foi le Peresetene o le Auso i la outou tapuaiga. Aemaise o le laumua i Fogaa i ona o le tulaga faalupe o lo o faapena ona nopiai ai le aufaigaluega tofofi a le Atua o e o lo o faapena ona tapuaia o tatou faiva ma faanonomanu. Faafetai i la outou tapuaiga, faafetai le fai tatalo.

Ia lau Susuga i le Toeaina Fili Sio Matalavea ma lou faletua, le Toeaina Faatonu o le Ekalesia EFKS o lo o faapena ona matou mafuta i Faleula, faafetai. Faafetai i la outou fai tatalo o lea ua outou toe lagona mai le leo o Loau. O le Susuga ia Tavita Pagaialii ma lou faletua o le Taitaifono Aoa o le AOG i Samoa ma atunuu e mamao o lo o nopiai foi ma faafalelemalu i totonu o le afioaga i Fogaa, faafetai le fai tatalo ua faapena ona manuia ai ma oo mai i lenei itula o lo o tulai atu i totonu o le Maota Fono. O le Susuga ia Patele Mauola, faafetai, faafetai le fai tatalo aemaise le loaloa o le aufaigaluega i ona tulaga faalupe i totonu o le afioaga i Faleula aemaise o lou itumalo.

Si ou nuu i Aele, le Susuga i le Faafeagaiga o lo o faapena ona tautua ai, faafetai. Faafetai le fai tatalo, faafetai le onosai. Ia lea ua tali faaaliali le Atua e tusa ai ma tofiga.

Aemaise foi si ou pitonuu i Nu'u, ia ma Tafaigata, le aufaigaluega tofofi o lo o faapena ona nopiai ai, malo le fai tatalo.

Si o tatou nuu i Faleula i ona tulaga faalupe aua le susu o le Toetaufanua ma Alo o le Malietoa, Maopu ma Tapunuu, lau Fetalai i le Tagata fou, le mamlau ia te oe le Faletolu. O lea ua tau lau, ua tau ai o le tatou faamoemoe, ua tau lau, ua ou toe tulai atu e tauave le tatou tofi.

E matau foi e fou lenei itumalo pe a fua i ai i le Nofoa o Sagaga Nu.1, o lea ua matou eseese ma nai o matou uso i le la itu o le usoga. Aua foi Aiga e Tolu ma lau fetalai Luatua ma le Gautaala. E pei o le agaga lea, malo le tapuai, faafetai le fai tatalo. E le gata i lea, o nai o matou aiga uma, o uo ma e masani o lo o mafai ona faafogafoga mai ai, faafetai le tapuai. Malo le fai tatalo. Ia, o le a sagai ane ai o le tai aua foi lenei Paeai i upufai o si o tatou Malo. Ia, matou faapena ona opogi le faamoemoe, ma matou faufautua atu, i ni mea foi matou te talitonu e le o atoa i ai le silasila a lena Itu i lau Afoga i le Palemia ma

lou auvaa, ia matou fautua atu. A talia lelei, a le talia a o la e ua oo atu sa matou fautuaga.

O le agaga moni lea ia tatou galulue faatasi aua le manuia o si o tatou atunuu. O le a foi se faamatalaga, ia, si ou tina ua 80 ona tausaga i lau tapuaiga, faafetai. Faafetai le fai tatalo, tui mai le mulipapaga aua foi faiva o si au tama aemaise nai o matou aiga uma a tuafafine, o uso, aemaise si ou toalua ma si au fanau. E le faigofie le auala sa tatou asaasa mai ai o lea ua tini tau lau o le faamoemoe, ua tatou taunuu lava i le nofoia o le nofoa o si o tatou itumalo.

Ia, o le tala atu lea lau Afioga i le Fofoga Fetalai. Ia faatumu le utu i lau Afioga, maua lou malosi aua ou tiute ma faiva sa faapena ona tofia ai oe. O taua foi e i ai lo ta gafa, ae ou te musu e tala lo ta va nonofo ai.

Ui o lea, ia manuia tele faasausauga ma toega o lenei aso. Faafetai foi i le mamalu o Ofisa Sili o Pulega ua mafai ona faatasi ai i lenei taeao ua maua lo outou malosi e vae ma lima aua si o tatou malo e tautuaina, maua sou ola. Soifua ma ia manuia.

Na faaalua le agaga fiafia o le Maota i le patipati o latou aao i le maea ai o le Saunoaga a le sui usufono mo Sagaga 3.

FOFOGA FETALAI: Ia faafetai mo le susuga pau i lau Susuga i le Toetaufanua a le Malietoa lau Susuga Loau. E leai o lea lava ua faafogoga ma toa le paia o le Maota aemaise foi o le atunuu ma si ou itumalo, faafetai mo le tofa faatamalii, e molimoli mai foi se feau a o se tuualalo foi ma se fautuaga aua lava le agai i luma o le tatou atunuu. O lea lava ua faafogafoga atu ma le totoa le Afioga i le Palemia ma le Kapeneta aemaise le Minisita o Tupe, ae leai o lea lava ua e lagolago ma molimoli mai foi nisi o fetu taua aua lava le manuia o le itumalo ma le tatou atunuu. O le mea lea, faafetai tofa, faafetai foi lauga faa-toeaina ma lagolago mo le toamalie o le tatou Maota. Faafetai foi o lea ua taua mea ua tuanai, ae leai e aoga foi e aoao mai mo i tatou i le agai i luma. O le mea lea, faafetai faasoa. O le mea lea, faafetai mo le lauga ma le fesoasoani mai i le tatou Tala o le Tupe.

Ia o lea foi ua avanoa le tatou Maota mo se sui usufono mamalu e sausaunoa. Ia, o lea ua matau atu o lea ua fou mai le sa o le sui usufono mamalu mai Satupaitea o se tasi foi o sui usufono matua o le Maota, Hon Lautafi Fio Selafi Purcell. Faafetai o lea ua tulai mai aua se sao o le tatou motu mai Savaii. O le avanoa lenei o lau Afioga.

Afioga Hon LAUTAFI FIO SELAFI PURCELL (Satupaitea): E muamua lava ona ou faatulou i le malae o Tiafau nei, le malae o le faautugatagi a Samoa, le malae o le tagatia, le malae o le faalelegafulu e lipoi ai upu o le tatou atunuu. E faatulou foi i le Maota Fono o Samoa.

I le afio o lau Afioga i le Fofoga Fetalai, afio lau Afioga i le Palemia ma le mamalu o lau Kapeneta, faapea foi Minisita Lagolago. Oo mai i lenei Itu i le afio o lau Afioga i le Taitai o le Itu Agai, Sui Taitai ma le

mamalu o sui usufono uma. E faatalofa atu i Ofisa Sili o Pulega o Matagaluega o lo o tua i ai le tatou Malo aua galuega faatino.

E faatalofa atu i le tapuaiga a Samoa, i le afio o Le Ao Mamalu o le Malo ma lau Masiofo, afio le Sui o le Fono a Sui Tofia ma lou faletua, afio le Faamasino Sili, le mamalu o alii ma tamaitai o le Ofisa o Faamasinoga. Afio foi le Afioga i le Peresetene o le Faamasinoga o Fanua ma Suafa ma Faamasino o lena foi vaega.

E faapea foi le tapuaiga a Samoa o lo o tapuai mai fale, Tama ma o latou Aiga, Aiga ma latou Tama, le usoga a Tumua ma Pule, Ituau ma Alataua, Aiga i le Tai ma le Vaa o Fonoti.

E faapea foi o tatou uso i le motu i Sasae, i le afio o le Kovana Sili ma lau Masiofo, le Fofoga Fetalai o Maota e Lua o le Senate. O paia lava ia aua Sua ma le Vaifanua, Fofu ma Aitulagi, Saole ma Saleaamua ma le Launiu na Saelua. Afio foi le Afioga i le Laau na Amotasi, Auvaa o Tootoo o le Faleula ma le paia ia te oe le Manuatele. E faatalofa atu foi i le mamalu i le aufaigaluega uma a le Atua o lo o faafalelemalu i totonu o Samoa atoa aua se manuia o si o tatou atunuu. O paia ia o Samoa mai Saua seia oo i Analega.

Ou te fia faapai atu i si ou itumalo o Satupaitea, i le Susu o Asiata na falefa i ai Tumua, o oe o le Vaimalae, Susu Tupai o le Vaati o Nafanua, Susu le Aiga Samoeleoi ia Tavui ma Gasu, afio Alo o Lilomaiava ia Faanana ma Tuimaseve, afio Tapaafanua o Tonumaiepa. Le Aiga Sa Valomua ma le Suafa o le Fauatea, o Tapaafanua ia o Asiata. Afio Tapaaganua o le Tonumaiepa. Alaalatai oe le mamalu i le Alataua, Tapaulefano Nofo a Pule male Matuafia.

E faapea foi faletua ma tausii, saoa, le malosii o le tatou nuu, tainane foi le paia o auauna a le Atua o lo o i totonu o le tatou itumalo i totonu o Satupaitea. E momoli le agaga o le faafetai i lou itumalo i lenei itula. Faafetai i lo outou amanaia o Lautafi, lea ua outou toe tuuina mai lo outou faatuatuaga ou te sau ai e faaleo sou finagalo i totonu o le Maota lenei. O lea ua tolu ai Paeaiga o tuu mai pea le faatuatuaga o si ou itumalo.

Ia, pau le tala e fai atu, le Atua fesoasoani mai ia te au ina ia mafai ai ona ou faia galuega ua outou tuuina mai au ou te sau e fai. E leai sou tomali, leai se agavaa, na o le poto lava mai le Atua e mafai ai ona tauave uma galuega a le sui usufono i totonu o le Maota lenei. Ia, tapuai mai, ou te manaomia la outou tatalo, ou te manaomia la outou tapuaiga lelea e tauave ai tofi o le tatou itumalo i lenei Paeaiga Lona XVII o le Palemene o Samoa.

E faatalofa atu i si ou tina matua ia Anasoa. Ua le mafai ona sau i le faatautoga, talu ai tulaga na tulai mai. O se faanoanoaga sili lena ia te au.

E faatalofa atu i si ou tina matua i Ausetalia ia Foti pe afai o faafogafoga mai. Faamalo tatalo, o ouluga ia e ave ma poutu o lou olaga faa-Palemene, faa-faafaipule, tatalo i aso uma ia ma fai mai le fautuaga.

Ia, tatalo mai pea i le isi 5 tausaga. O a foi ni tulaga o le a toe tulai mai i le fesouai lea ua i ai nei Faigamalo, e fou e fou. Aisea? O loto o tagata, o loto o tagata. Se i vaai ia Samoa o se tamai Nuū laitiiti ae o le a le tulaga lea ua tulai mai? E pei o mea o lea e tatou te vaai ai i fafo. Ua puipui ia le aiatatau a tagata e feoai ai, puipui le aia a tagata e omai ai i le Maota lenei. E faapea ona fai?

Afioga Hon Fiamē Naomi Mataafa: Lau Afioga i le Fofoga Fetalai...

Afioga Hon LAUTAFI FIO SELAFI PURCELL (Satupaitea): Se i faauma atu...

FOFOGA FETALAI: Ia, ou te iloa lea ua, tulai mai lau Afioga i le Palemia.

Afioga Hon Fiamē Naomi Mataafa: E matauina pea o lea lava e fefoifoiai tatou i le mau lea e tauave, tuu ia mea ua uma ae o tatou agai i le lumanai. Ae matauina lava, o lea lava e lagalaga mai. Ia e fai foi o le matau a lena itu, ae e i ai foi le faitau a lenei itu.

Fia masina? E le mafai ona oo mai i totonu o le Maota lenei. Fa masina, oi a matau mai la lo outou le omai i le vaiaso la ma le fa masina e le i mafai ona omai ia sui usufono o le atunuu i totonu o le Maota lenei? Faiga a ai?

Lau Afioga i le Fofoga Fetalai..

Susuga Hon Tuilaepa Fatialofa Auelua Sailele Malielegaoui: Lau Afioga i le Fofoga Fetalai...

Afioga Hon Fiamē Naomi Mataafa: A faapea ua le mafai lava ona moni upu ia e le toe vaai i tua tatou o e faitau po o le a le sao.

FOFOGA FETALAI: Se i onosai mai lava le Taitai o le Itu Agai, e i ai lava lou taimi lau Afioga i le Taitai o le Itu Agai.

Susuga Hon Tuilaepa Fatialofa Auelua Sailele Malielegaoui: E na o sina fesoasani atu lava, ae o lea e lagalaga mai pea mea ia? Onosai mai foi outou leaga e tou te le i faalala.

FOFOGA FETALAI: Onosai mai ia le Taitai o le Itu Agai, onosai mai pea se i faauma mai pea le... ou te talitonu foi ua...

Afioga Hon Fiamē Naomi Mataafa: Leai o le uiga lena o lau tala, saunoa mai, faapea atu lau Afioga o lea ua o tatou malilie uma e faagalō ia mea ua tuanai. Tatou agai i luma, ae o lea lava e saunoa mai pea.

O le mea la, a faapea ua outou le finagalo i le mea lena, tatou toe foi i tua tatou talanoa. Fa masina, uma le palota le mafai ona ulufale mai i totonu o le Maota lenei. O le a le amiotonu o lena mea?

FOFOGA FETALAI: Ia faafetai i lau Afioga i le Palemia o lea ua maua. Ia le sui usufono mamalu, ia o oe foi o le tasi tama matua mai i le tatou motu i Savaii. Ia Salafai, o lea ua e maua ua uma ona i ai le leo o le Nofoa ma le faaiuga a le Nofoa e le o toe manatu lava i ia tulaga.

O le mea lea finagalo malie lau Afioga Lautafi, ia taatia ia mea ua tuanai, tatou agai i luma, leaga e tele lava le felefele pe a e toe aumaia ia mea. O le mea lea, ia manaia nai ia toeiina ua uma atu la ua lagolago mo le agai i luma. Ia ae faatea ia mea ua tuanai.

Afioga Hon LAUTAFI FIO SELAFI PURCELL: Faafetai i lau Afioga, ou te ava tele i lau Afioga i le Fofoga Fetalai. Mo lou silafia, na ou sau lava i le aso ananafi ou te le lauga i se Tala o se Tupe ona e le taua le mea lea pe a faavasega i tulaga i le mea lea e i totonu o lou fatu. O le mea lea e ootia ai lou agaga, ou te le kea la i ni Tala o ni Tupe. Ae o lou ava i lau Afioga ia aua o la foi e fai mai le la vaega, pei ona fai atu le tala leaga e le i faalala i le aso atoa. Ua vaai mai i foliga ua ese foliga i le vevela o le la, ia ae o le a ou see ese ona o lou ava i lau Afioga, faapea foi le Palemia. Ae e tatau lava ona i ai le taimi e avavatu ai i fafo mea nei, leaga ua leva ona i totonu.

FOFOGA FETALAI: Ia faafetai lava...

Afioga Hon LAUTAFI FIO SELAFI PURCELL: Ia o lea la ua uma.

Afioga Hon Fiamē Naomi Mataafa: Lau Afioga i le Fofoga Fetalai, ia o lo outou fia faalala lava, ae o matou, na matou o i le paolo o le Faamasinoga, ia lau Afioga.

FOFOGA FETALAI: Ia, o lea ua faauma mai le saunoaga a le sui usufono mamalu, ou te talitonu foi o lea...

Susuga Hon Tuilaepa Fatialofa Auelua Sailele Malielegaoui: E leai ni leoleo lau Afioga, a oo loa ina talatalanoa mea ia, e fai lava sina lautele. Na outou omai lava i le faleie ae leai ni leoleo na omai e aveese outou pe pa puipui outou.

FOFOGA FETALAI: Ia, malie ia ia o lea ua o tatou... o la foi ua saunoa mai ia le sui usufono ua see ese. Ia o tatou faatea ia mea ua tuanai... ia faaauau mai le saunoaga a le sui usufono o lena ua uma mai i fafo ia mea sa mamafa i lou finagalo. Ia ae faamama ma o tatou agai i luma. O oe o le tagata lotu. Ia saunoa mai ia le sui usufono mamalu.

Afioga Hon LAUTAFI FIO SELAFI PURCELL: Ua tau uma foi ia le faatuatua i isi taimi i tulaga i mea ua tulai mai. Ia ae o le a faataatia ia faapea. E tau ina silafia, e le mafai ona galo. Ma e faamau pea i faamaumauga le tetee malosi le sui usufono o Satupaitea i tulaga ua tulai mai i ona tulaga uma. Ia ma lou faaaloalo.

Na ou see mai lea i le Tala o le Tupe, faafetai i le Minisita, atonu o le Tala o le Tupe muamua lea a lau Afioga. A i ai la ni mea o lape ai, ia sala i le lape. O le mea muamua e le o se mea faigofie ia le taumafaiga o se Tala o le Tupe muamua aemaise o le tulaga lea sa o tatou i ai. Ua le iloa po o fea ia le Tala o le Tupe po o fea le vaega lea e pipii mai ai isi vaegatupe seia oo mai i le taimi lenei. Ia ae faamalo.

O le saunoaga a le Minisita, e na ona ou faufautua atu pe tuualalo, se tuualalo e pei o lea sa taua e se tasi o sui usufono lea e faapea mai, \$1 billion, public debt, switch \$1 billion. This is equivalent to 5% of GDP. O le upu la lea ou te le fiafia ai, lea foi sa, “it is unfortunate for the new Government to inherit such a high debt”. Ia lea saunoa atu le isi sui usufono, e le o se faaupuga lena o lea ituaiga aitalafu laititi faapea, na o le piliona. E negative tele lena faaupuga. A faalogo mai ia Atunuu i fafo, e faapea ai toeitititi bankrupt lo tatou Atunuu.

O le challenge lea ia outou, o lena ua outou tulai mai. Sa tataua ona faapea le faaupuga, “this government is ready to face the challenges left by the old government”. Sau le luitau matou te talia, e leai lava se manatu faapea tou te afifio mai, o la lava e smooth mea uma faapea. Ia outou silafia foi, o le mea lea e leaga ai le tuai ona ou lauga, o lea ua ou lauga atu o lea ua uma ona fai uma atu e le isi vaega lea ia tala. I le leaga o le lalolagi lea e i ai, le economy o le lalolagi. Ae a tatou? O lea lava e lelei lava le tatou atinae.

E ui ina leai ni a tatou tupe e maua mai ona ua tapunia femalagaiga ona o le faamai. A o lea lava e taumafai ia Samoa. O lea lava ua toe pick up le tatou economy. A faalogo tagata i faaupuga faapea ia ona faapea lea, ua matua pufafa le economy i le HRPP. O lea ua togi mai i i, i le vaega lea, ia o ifo lea e fai le tatou Malo. Ia e leai, na taatia uma i le taatiaga lelei sa i ai, tuu atu loa i outou aao.

E na o se fautuaga mo le lumanai. A amata le mea i le negative, e faapena ai lava le attitude. Ae a amata i le positive se mea, matou te le foi ai i le lui lea. Ou te lagona e saogalemu lava lau Afioga i le agai i luma.

O le Tala o le tupe, ia te au lava ia ma lau tilotilo i le Tala o le tupe lea. E pei o se tala o se tupe foi lea, e le i vaai mamao i le tulaga lea e taatia mai ai. E pei o se mea na ona tau e faamalie ai ia le Atunuu i se taimi puupuu. Ae le o iloa, po o fea e i ai ia le gafataulimaina o le Tala o le tupe lenei i le 12 masina. Sustainability of this budget in the next 12 months.

O le tele lava o mea ia sa i i, sa matou taumafai atu tou te afifio atu e silasila i ai, e faatonutonu ai mea e fia fai ma mea e le faia. O mea la na ia o lea lava, i lau tilotilo o mea lava sa fai, e mafai ona... mo le 12

masina. Ae i ai isi mea ia ou te masalosalo ai, pe mata e taunuu ia mea. Ona e pei na ona fai tuu i lalo i le pepa ma fai ni faaiuga, ae le i tilotilo i le aotelega o le aafiaga o le tamaoiga i le faaiuga lea ua fai i lalo o le Tala o le tupe.

E talosia ae ou te sese, talosia o lea ou te sese. Ae pei ni faaiuga na fai foi lea, ia tuu atu i ai, faamoe ai lava i ina le vaega lena, se i oo i se taimi ona toe aumai lea e toe poupou pe a fai e i ai ni aafiaga e tulai mai. O lau personal tilotilo lena i ai i le Tala o le tupe. E pei ona ou fai atu, talosia...

Afioga Hon Fiamē Naomi Mataafa: Lau Afioga i le Fofoga Fetalai, e leai se agaga e fia faalavelave, o lea lava e saausi a le faafogafoga a le Kapeneta. Ae le mafai e tuuina e alu le saunoaga lea. E pei e foliga mai i saunoaga a le sui mamalu, o lea e olegia e le Faigamalo lenei le Atunuu, e ala atu i lana Tala o le tupe. E le o se lafoga lelei lena mea. Ma lau Afioga i le sui usufono, a faapea e te saunoa mai o lo outou agaga lena mo le atunuu. O le a la lena ituaiga lafoga e te saunoa mai ai? Matou te omai e oleole le Atunuu? E faanoanoa i se lafoga faapea, lau Afioga i le Fofoga Fetalai, e tatau ona aveese ia ituaiga upu mai faamaumauga a le Maota. E leai se mea e afaina ai pe a e saunoa mai, e le lelei le Tala o le tupe. A o le mea lena faapea e tuu ia ina faamalie, o lona uiga e pepelo. E olegia le atunuu. Ma ou te le talia lea ituaiga lafoga lau Afioga.

FOFOGA FETALAI: Ou te iloa o lea ua manino le tulaga lea lau Afioga i le sui mamalu. O lea ua faamanino mai e le Palemia, o uiga lava ia o tatou, e tatou te faaeteete foi i tatou saunoaga ma upu ona o lea e faafogafoga le Atunuu, ne i mea ane ua tau pelogia e le Faigamalo le atunuu. O le uiga lava lea, o lea ua aumai le lagolago a lea itu, na o upu e lagolago ai, a o se tulaga e faapea e pei e pelogia o le ala lena. O lea foi ua matau atu, o lea ua aumai le finagalo o le Palemia e tatau ona aveese o ia upu faapea o le masalomia o le Tala o le tupe, pe taunuu pe le taunuu.

Lau susuga i le failautusi, e talafeagai mea ia, leaga o lea ua ou matau atu, e ono le faatuatuaina ai tala o le tupe. Ma le isi lava mea ou te fautua pea i sui usufono. Le upu a faa-Samoa, “O le fuata ma lona lou.” Afai foi ua filifilia e le Atua le Faigamalo ua i ai nei, tatou faatuatua ma faamoemoe i le Atua, o lea foi e i ai le Atua i le Faigamalo, e pei foi o outou taimi o outou tulai mai.

O le fautuaga lena a le Nofoa, ne i tou pea mai, ai e faaoleole. E leai, a fai lava ua filifilia e le Atua lea Faigamalo, o lea foi e i ai le Atua i le Faigamalo lea. E i ai foi isi auale e silisili atu ona lelei. O le mea lea, o lea ua faatonuina ina ia aveese ia upu, a ia saunoa sao ma ave le fautuaga sao i le mea o i ai le tatou...ina ia manuia le atunuu. O oe foi o se tasi o sui tuai o le Maota. Ma le agaga faaloalo, tulai mai le sui mamalu.

Afioga Hon LAUTAFI FIO SELAFI PURCELL: Faafetai i lau Afioga i le Fofoga Fetalai,

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai: Lau Afioga i le Fofoga Fetalai, se e tasi lava si mea sia. Se o lea e fai saunoaga faalauaitete. E leai se mea e popole ai fua, e i ai le taimi e tali mai ai latou, ona tali mai lea. Ae leai lava ni upu matuia o i ai, o uiga lava ia o lauga faa-Itu Agai a o la e i a le taimi e tali mai ai latou.

FOFOGA FETALAI: Leaga o lea ua i ai le faatonuga, e talitonu lava e faapena. Se o outou foi sa outou i lea itu, ia e faapena. E avatu upu ina ia lagolago ai se mea ia lelei. Ae le o se mea e pei e faamasalomia ai se galuega lelei ua fai. O le itu lena o lea e popole ai le Nofoa. Tulai mai le sui usufono e faaauau le saunoaga.

Minisita lagolago o Leoleo, e i ai se mea o tulai mai.

Afioga Fepuleai Faasavalu Faimata Sua (Salega 1): Faafetai mo le avanoa. E matau foi e lou sui usufono le tulaga ua oo i ai saunoaga. E taua i lau faalogo le saunoaga a le Taitai o le Itu Agai, i se taimi ua sola. Matou te o atu e avatu le matou lagolago e 500%, o lea la ou te nofo ma ou mafaufau ma ou faalogologo. O au o le o le sui usufono fou, e matau foi uiga o saunoaga ma upu e tusa ai foi ma le Tala o le tupe. O lea ou te nofo ma faalogologo ma mafaufau po o le a le maualuga o pasene lea ua oo i ai. Ae pei e foliga mai o taimi uma lava, e i ai le agaga foi lele fai mai o mea sa o matou tapena e fai, lea ua tatau ona fai. E pei e i ai se agaga, a alu alu i luga pasene toe alu i lalo.

Ia faa-500% faamolemole.

FOFOGA FETALAI: Ia faafetai, o lea ua maua atu

Susuga Hon Tuilaepa Fatialofa Auelua Sailele Malielegaoi: E 1000%, a o le 1000% lea, e auala atu i le tuualalo faa-Agai. O le tulaga o lena e te fou mai totonu o le Maota.

FOFOGA FETALAI: Ou te iloa lea ua maua mai Lautafi. Ia aua ia le faia ma le masalosalo, ae tatou o ma le mautinoa ma lagolago ia mautinoa ia la tatou Tala o le Tupe. Faaauau mai le saunoaga.

Afioga Hon LAUTAFI FIO SELAFI PURCELL: E leaga matou o lea matou te tilotilo. O le fesoasoani lena, matou te avatua o le tuualalo. Silasila ane i ai, a outou silasila atu lava outou ia e le talafeagai aua le faaaogaina, aua le faaaogaina. E le faapea o se attack i se tagata, po o se integrity, e leai. O matou manatu lava lea e avatu ae faavasega ane e outou. Ia lo outou tulai mai, o matou lea ua tulai atu, e matua scrutinize ia mea, ae leai se tulaga e faapea e masalosalo i le tala o le tupe.

FOFOGA FETALAI: Saunoa mai le sui mamalu.

Afioga Hon Fiamē Naomi Mataafa: E le afaina le saunoaga a le sui mamalu. Pe lau mai e vaivai le Minisita pe faaletonu le matou Faigamalo. A o le faapea mai, o se mea e tau ina fai e faamalie ai le Atunuu. O i ina, e atagia mai ai e fai e le vaega lenē se mea e faaletonu, intentionally, e tau ina faamalie ai. E le o lena, e talia lava le faapea mai e vaivai, ioe o outou ua outou popoto. E leai se mea e afaina ai. E na o le pau lava le mea, e tapena le Minisita ma le matou Kapeneta e fuafua se mea e sili mo le Atunuu, ae na o le pau lava lena.

Tofa Lealailepule Rimoni Aiafi: Lau Afioga, e pei ua maoae foi lea upu.

FOFOGA FETALAI: O ai e te faauilavea i ai?

Tofa Lealailepule Rimoni Aiafi: E leaga o le mea e fia faasao, leaga e faapea mai ua matou fai atu, ua popoto matou.

FOFOGA FETALAI: E le faatagaina oe e le faauilavea i le sui lea e saunoa.

Tofa Lealailepule Rimoni Aiafi: E tasi ia ae foi, e leai se manatu faapena, ma le faaaloalo lava.

FOFOGA FETALAI: O le mea lenē e tau o le faauilavea i le isi faauilavea. E leai e le faatagaina i le tatou Tulafono Tumau.

Saunoa lau Afioga Lautafi, o lea ua e maua mai le agaga o le Palemia. E le afaina lava lena, ae aveese le mea lena e pei o se mea e fai e tau ina fai. Saunoa mai.

Afioga Hon LAUTAFI FIO SELAFI PURCELL: O lea lava ua aveese ia upu ia na fai. O upu ia na fai faale-Itu Agai. E leai se...ua ese le mea lea ua tau oo i ai saunoaga a le Palemia. E leai lava ma se naunau faapea a mea e popoto lenē itu. E leai, e tutusa uma lava tatou i le silafaga a le Atua. O lena lava ua tuu atu e fai lo outou faiva matou te lagolago atu faale-Itu Agai. A o le upu lena, ia aveese, ma e le o le uiga lena na tu atu ai Lautafi. E sao lava lona loto, e alu atu lava i inēi tau i le Atua.

O le tele o isi mataupu ia e uiga i le tala o le tupe, o le a tuu se i ou talanoa i ai i le isi ou avanoa 15 minute. O lea ua toe oo mai lava le manatu ua ou le fia talanoa foi i se tala o se tupe. Ae o le a ou talanoa i ai i le 15 minute pe a toe maua le isi ou avanoa.

Ona ou oo mai lea i le uso lea Minisita o le tatou vaalele. O le a ea le mea ua oo i ai le tatou vaalele lau afioga? Ou te alu ese ma le Ofisa, e tusa e fa (4) aso e taunuu ae le vaalele i o. E fa (4) aso taunuu mai loa,

ua uma foi ona faataatitia uma fuafuaga ma tulaga uma faapena. O lea o le a fa (4) masina e le i oo mai lava le tatou vaalele. Talofa e i si vaalele, po o fea o Ausetalia na e faala ai.

Ae o lau tuulalo i lau Afioga i le Minisita, ia toa lou loto. E i ai lava foi tagata o na e fautuaina oe, e palaaai o latou loto. Ia toa lou loto. O le galuega lena. It's you defining moment as a Minister, le aumai o le vaalele i Samoa. O lena ua taatia atu, e le taulaulauina atu a tatou penefiti e maua. Ioe, e i ai aitalafu, o aitalafu e tataua ona tatou tilotilo i ai, o challenge mea na, mea o luitau. Ae le o le avatu loa, "oh e tele ai aitalafu a Samoa." E le mafai la ona move Samoa i luga pe a fai o lena. O la ua i ai avanoa e maua ai a tatou tupe, e le toe maua se vaalele faapena i lona... lelei, atoa ai ma le lisi na e i ai. E le toe maua lena avanoa.

FOFOGA FETALAI: Tulai mai le Minisita o Galuega.

Tofa Olo Fiti Afoa Vaai: E faafetai atu lava i le Afioga i le sui usufono, leaga o lea ua oo tonu lava, nei te i foi ua...e manaia le tope atu o lau tali i le taimi lenei. Ona o tulaga i le tuai mai ona taunuu mai le vaalele.

E le natia lau afioga foi sa fai ai foi le maua faafinauga ma le Afioga i le Minisita nei. I le tulaga o le tatou vaalele. E le o se isi itu, ou te tau mama atu, o au lea na tuai mai ai le vaalele. Sa ou taofia ia le tulaga o le vaalele, ona o le vaalele e aumai i Brisbane e le i atoatoa lona safety, e tatou te faaaogaina ai. O le vaa foi la ua faasolo i le mea lena, pe ua masina atoa o faasolo ia siaki taua foi ia mo le vaalele i le faaaogaina e lo tatou Atunuu i lona saogalemumu.

E le gata i lena, sa faatonu foi nisi o vaega spare parts e faaleleia ai le tatou vaalele. Lau afioga o le tulaga lava lena sa ou naunau i ai au ia, i le faamalieina o le matou tulafono. Aemaise lava, o le tulaga o le saogalemumu o le tatou atunuu e faaaogaina ai le vaalele lea. Ae pei o le tulaga lena, a fai lava ua uma ona faamalieina tulaga o le siaki lea, ona faapena foi lea ona ou talia, ma certify le vaalele e oo mai i lo tatou Atunuu. A o le taimi lenei, o lena foi e te silafia a ou le saina, e le aumaia le 2 vaalele ma lau Minisita le la.

A o le taimi lenei, e sa ona ou vaai i le lua vaalele i o, i lou malaevaalele i Faleolo pe a fai e le faamalieina uma itu ia. Ma le faaaloalo.

FOFOGA FETALAI: Ou te iloa o lea ua tali lou finagalo, o lea e fuafua e aumai, ae se i uma ala faale-tulafono ma ala o le saogalemumu o le Atunuu. Ae faafetai o lea ua oo le fautuaga i le Minisita.

Ia faaii mai le saunoaga.

Afioga Hon LAUTAFI FIO SELAFI PURCELL: Ia faafetai, o lea la ua ou iloa le tagata lea e fautua ma taofiofia le tatou vaalele. Ou te

ofo foi i le vave faaletonu o ni mea o le vaalele. Ae na ou alu ese ua i ai uma mea uma. O lona uiga na oo mai loa ia Olo, nofo loa Olo ma fai nisi faiga ia fai ai ni lipoti a lana Matagaluega ia aua ai ne i aumai. Se fai i le tama le la o Hoe e faatopetope ifo. E leaga o le au vaega foi lena e...ae faafetai i lau afioga, o lea ua maua atu. O mea lava tau...o le safety lava le mea e silisili. E manatua o le vaalele na lele mai o i Netherlands. E tusa la e tolu (3) aso taunuu mai i i, i Brisbane. A fai la e i ai ni mea faaletonu i ina, aua o le mea lava lena na aumai e tu i Brisbane, e toe fai ai le safety check, seivagana la o ni mea na leaga mai o. Aua na fai foi i o ia le siaki i Netherlands toa sau ai. E tau mai i i, po o fea, e lua nuu na na i ai. E o mai foi ma siaki lava.

Ae fai lava e le o faamalieina ia tulafono tau safety i Ausetalia ma i inei, ia e taatia atu pea i ina. E sili lava le aumai o le vaalele a ua mautinoa. A o le tulaga ia i mea sa taumafai i ai, ta te popoe lava i te i ua misi lena avanoa. Aua tatou te fefefe e faapea.

Afioga Valasi Luapitofanua Toogamaga Tafito Selesele (Minisita o le Soifua Maloloina): Lau Afioga i le Fofoga Fetalai, o si mea e fia faamanino laititi lava.

FOFOGA FETALAI: Saunoa mai lau Afioga i le Minisita o le Soifua Maloloina.

Afioga Valasi Luapitofanua Toogamaga Tafito Selesele: Ou te le i manatu e faalavelave i le lauga manaia a lou uso a faipule. E pau lava le mea e le faapea o faipule mai i Satupaitea a o ma nonofo ai faatasi, o lea ou te faipule mai Vaisigano 2. Na o se mea e fia faamanino, ou te manatua lava le folafolaga na fai a le Minisita i le taimi na aumai ai le uluai vaa. Fai mai le tala a le tamaloa. O lea Samoa ua maua lo tatou vaalele, tausaga muamua maua le isi vaalele, tausaga lua, maua le isi vaalele. Tausaga tolu o le fuavaa. O la lava e mau i faamaumauga o ana faasalalauga. O le a le mea lea ua tupu? O le fuamoa, na o le gau faaopoopo i luga o le isi gau faaopoopo i luga...e le o se...E manatua foi tala a le Afioga, a le taitai, leaga sa ou saofai mai o, a o i ai le tamaloa. E le tuumamaina e le Malo, le tali atu i mea ia, ae sa saunoa i taimi ia. E pei o le faamaninoga lea lau afioga.

A manao e aumai se tape o le mea lena o la e i ai faamaumauga.

Susuga Hon Tuilaepa Fatialofa Auelua Sailele Malielegaoi: Lau Afioga i le Fofoga Fetalai, o sina fesoasoani atu i le mataupu lea. O le vaa lea o le BOEING e eseese ma le vaa lea a Falani. E lele loa le BOEING mai le isi airport i le isi airport, e taofi loa ae check. Ae le faapena la le vaa o Falani.

Afioga Hon Fiamē Naomi Mataafa: Faamolemole lau afioga po o ai lea e faauilavea i ai le Afioga i le Taitai o le Itu Agai.

Susuga Hon Tuilaepa Fatialofa Auelua Sailele Malielegaoi: O lea na ou fai atu, ona o faamatalaga lea sa fai i le Kapeneta a o saofai ai Fiamē. E manatua foi la le vaa lea, o le vaa lea na matou gaoioi faatasi ai ma Fiamē. A o lea ua te i lava ua le fia malamalama.

FOFOGA FETALAI: Faafetai, o lea ua oulua au toalua mai ma Lautafi i le lua pito. O lea ua maua, o le mea lea...O le avanoa lenē faauma maia le saunoaga. Se i saunoa maia le Minisita o feagai ma le vaalele.

Tofa Leatinuu Wayne Soialo (Minisita o Leipa ma Fefaatauaiga): E autilo atu lava ua naunau mai si ou uso, sa galue foi i inē i lenē itu. Ae taatia mai lou finagalo. O le umi ai lava o a outou finauga i i, ae e le o le mafuaaga o laisene. O le mafuaaga o le tupe e faatau ai spare parts. Ona sau loa lea. A maua loa le seleni, o lo o i ai foi le komiti faapitoa ua uma ona tofia e le Kapeneta e iloilo le tulaga lea. O lo o i ai foi laua a lo tatou Malo sa iloilo ina muamua lo tatou vaalele. O i latou o lo o galulue i le tupe, faaopoopo atu i ai o se finagalo ma manatu o lenē itu, ona maua ai lea o le iuga o le tatou vaalele, ae le toe umi. E masalo po o lea vaiaso pe a uma le lockdown, ae lototele ma faatuatua i le Atua. Atonu lava e maua se tali lelei mo i tatou. E le o i inē foi le vaega e fefefe i ia tulaga, o lo o ia matou foi le lototele e tau fai ai le faafitauli ua tulai mai. Ae malo le onosai, malo lava le faatuatua, faafetai.

Susuga Hon Tuilaepa Fatialofa Auelua Sailele Malielegaoi: O lea la ou te faafetai o lea ua tau le sao. O lea ua sao le aumai a le..

FOFOGA FETALAI: Ua e tagai la Lautafi i le lototele o le Minisita. O le mea lea aua e te popole. O lea lava e tulai mai le Minisita, ae leai e faapena, e maua le lototele i lo tatou vaalele.

O le mea lea, o lea ua talia lou finagalo. Faaauau mai le saunoaga.

Afioga Hon LAUTAFI FIO SELAFI PURCELL: O le nofoa lena sa ou nofo ai i totonu o le ma ofisa lena e tusi ai le igoa, lototele. O lea la ua pisia ai...ia faafetai i si ou uso a Minisita. Faafetai o lea faatoa ou talitonu i le saunoaga a lou uso a Minisita. Atonu ou te talitonu foi i se isi taimi ia Olo pe a taunuu mai le vaalele. Ae faafetai o le measili na ua faalogologo atu, o lena lava ua galulue ina ia taunuu mai le tatou vaalele, ma amata ai loa ona faagaoioi i tatou malaga ia na fuafua, e vave ai ona maua mai ni a tatou tupe. O le umi lava o le tu i o, o le umi foi lena ona maua o tupe a le Air New Zealand ma Qantas ae matamata lava tatou.

Ona ou oo mai lea i le isi mataupu lea i le tatou maketi lea na sua i Sogi, leaga o la sa i lalo o lau vaaiga i le taimi lea. O se galuega ua tele foi le tupe ua alu, a o lea ua ou mataua, e pei lava o le toe faia. Ia, o le

naunau lava ona o fuafuaga foi lava sa fai e matou a o lena ua pule ai outou. Ae po o le a la le tulaga i le agai i luma. E pei ona ou fai atu, ua tele tupe a le tatou Malo ua alu i le tanuga o le mea lea ma isi lava mau tau. Po o silasila i ai lena itu, ae po o le a foi se fuafuaga, aua o lea ua ou faalogo o le a toe fai lava le maketi i o i le mea lea na omai Niu Sila fai mai e fai ai, aumai le latou... i lena foi vai tau. Aumai e latou le tupe, toe pule mai lava latou i le size o le fale ma le design o le fale, ae na o le nofonofo lava o tatou. Pei o le mea lena na fai ai, e leai, e aumai le tupe ona pule lea o matou i designs e suit iinei i Samoa. Aua o le tulaga lena sa aumai e Niu Sila, ia pei o mea o boutiques foi ia i o na o tagata maumea e o i ai i totonu. A o fea la o tatou tagata lea na fuafua i ai le maketi? Ia, e pei o se agaga lena sa i ai. Ae afai ua fnagalo foi le Malo o le a sui, ia, o tou mama na. Na pau lava lena o le tuualalo, se i silasila ia vave ona fai ae toe maua mai tupe ia ua faaalu i i i le totogiina o konekarate.

Ia se i ou tali atu lava, ua galo ia te au le Afioga, si ou uso lea ia Asiata Valasi Tafito. O matou a ia matou te omai i si o matou itumalo. Leai o le tala ia lena i lena taimi, a na faapea e leai faafitauli na tulai mai, e faapenei lava ua taunuu po ua lua tatou vaalele. E amata loa ona tau maua tatou tupe ae palasi mai loa ma le Koviti-19, toe alu faafuasei lava le vaalele lea sa tatou faaaogaina, taatia loa tatou ua leai se vaalele, tatou o loa aumai vaalele taugata, o lena lea, e uma atu le isi faafitauli, ae pau le vaalele lea o le MAX-9 a ua uma ona tusi le igoa. Leai na ona tau faamalamalama atu, leaga o lea e faapea le sui usufono ai o ni mea pepelo po o ni mea gau lea e fai mai. E leai. O le agaga lava ia, ia oo i le taimi, aua o fautuaga a i latou e masani ma tomai i mea nei o vaalele, a tasi le vaalele, o le faigata ia ona maua se tupe. A lua, o le tulaga lena na taumafai i ai. Ae peitai ane, ua le mafai ona fai ona o faafitauli na tulai mai. O lea la ua maua mai le tatou vaalele i le taimi lenei, ia talosia ia.

Lau Afioga, ia, toe tasi lava le mea lea, o le tulaga lea i le Daylight Savings lea ua faateia ai foi au ia. O le tuualalo e avatu i le Malo, e le faapea na o Samoa e aafia i le mea lea, ki i tua a tatou uati, e leai. E aafia uma lava isi vaega o le tatou nonofo ai i totonu, o le global world lea ua tatou i ai. O mea tau fesootaiga, mea tau vaalele, o a uma ituaiga mea, e aafia i le itula lea e tasi pe a sui. Ua programme uma tulaga uma o mea faapena. Ae a sui nei la le tasi le aso, e sao ai le upu foi lele, ua confuse uma le mea. O le tuualalo lava, atonu foi a talatalanoa i e e i ai i ia Matagaluega, atonu e maua mai ai se faalauteleaga o le manatu lea. Manatua foi a e alu atu e fai lau tickets, e alu atu lava alu i totonu, ia e alu atu i o, ua ese le mea lea ua tasi le itula lea ua e muamua ai. E tele ia. E pei foi o telefoni, ua iloa foi telefoni, e te le tago toe sui le date o lau telefoni. E oo mai lava le aso e fai ai le daylight savings e tago atu ua sui le aso, ae te le suia. O uiga na o mea ia e aafia. Ae na ona tuualalo atu i le mamalu o le Malo, se i toe tagai ifo lava i le faaiuga lena pe tataua ona fai, ona e le gata ia Samoa aafiaga.

Ia, le mamalu o lau Afioga i le Fofoga Fetalai, ia e momoli atu lau faamalo, Faamalo a Satupaitea. E ono lava tama Savaii pe a nonofo mai luga i ina. Faamalo i lou tofiga. Ia e lagolago atu uma au i lau Afioga i luga.

Faamalo foi i le faigamalo fou, lau Afioga i le Palemia, le Sui Palemia ma le mamalu i le Kapeneta. O lena ua outou tulai mai, e faapea foi Minisita Lagolago. E tatou te finau lava ma tatou feeseeseai i totonu i i, ae leaga o le mea lena na aumai ai tatou e le tatou atunuu. E leai se aoga e fai mai o le malae e lipoi ai upu, ae omai isi e fefefe e tautatala, ona o la e i lalo e pei e fefe e tautala ona faapea o ia e fou, po o ia e a ma a ma a. E leai, Faamalo. O tou mama na. Ia sagai ae ai o le tai, o le a taputapu ai atu foi lenei itu ma fesoasoani atu i uiga faa-Itu Agai. A ua i ai foi se upu ua sala i totonu o le Maota lenei, ia o la e silafia e latou na matou Paeaiga faatasi, e le masani ona faapea le leo o Lautafi. O le sui o Satupaitea, e toa lava le tai, ae ona o tulaga foi o mea ua tulai mai. E faamalie atu ma faamalulu atu, ia lafo ia i nuu le aina se tala a lenei sui usufono. O la foi e faalogologo mai si ou itumalo, aemaise foi nai ou aiga.

E faatalofa atu i lenei taimi lau Afioga i nai ou aiga uma i nuu mamao ma i inei, ua aafia uma tagata uma i lenei tulaga ua i ai le tatou faigamalo. E fai foi o i ina, a o inei, ua toso uma atu i ai i totonu tuafafine, o uso, o ai uma lava tagata, ia, ua aafia uma atu ai uma latou. Ia outou lototetele, o i latou na e lafoa upu masoa ma upu le talafeagai ia te outou, faatuatua outou i le Atua. Aua, aua tou te tilotilo i na mea. O mea na a le tagata vaivai e le lelei le aoaoina. Ia ona o ai lea i luga e lalafi ai i tua ma fai ai faaupuga. E pei o lena foi e alu lafi i tua o le fale ae tauai mai maa i luma o le auala e le mafai ona savali mai i luma e face le tagata. Ia fesoasoani mai le Atua i toe sauniga o lenei aso.

Faafetai o le isi mea lelei lea lau Afioga e faauma atu ai lau... ina ua matou omai i i, lea faatoa ou tilotilo atu i o i le aulelei o Ofisa Sili o Pulega o Matagaluega nei, aemaise lava le teine lele e nofo mai le ogatotonu i le vaega lea. O lea faatoa... pei e u i ai o matou tua i o, ae eseese lava auala e fai e le Atua, o lea ua matou tilotilo atu, oka, leitioa a lelei le tatou Malo.

Ia, ona faai ai lea o se leo lau Afioga. Ia manuia tele lenei afiafi. Soifua ia.

Na faaalua le agaga fiafia o le Maota i le patipati o latou aao i le maea ai o le Saunoaga a le sui usufono mo Satupaitea.

FOFOGA FETALAI: Faafetai. Malo saunoa. Ia, faafetai, malo lava saunoa, tanoa i lau Afioga i le sui usufono mamalu mai Satupaitea, o se tasi foi o tama matua i totonu o le Maota.

O le mea lea, malo le faasoa, faafetai foi le tofa faatamalii, o lea lava ua molimoloo mai lou finagalo ma fautuaga, ia atonu o lea ua talia, aemaise lava, ou te iloa sa mamafa lava le vaalele ia te oe, ae o le mea

sili lea ua talifuaitau le Afioga i le Minisita. Aua laia e te popole. O le mea sili foi faafetai o lea ua e faasoa mo le lumanai o le tatou atunuu. Faafetai mo fautuaga. Ia o le mea sili foi, o lena faatoa e silasila atu o la e saofai mai o si au... i luga i o. Ia, malo lava faafetai. O le fealofani e faapena, e faafesagai ma fiafia ma tapuaia ou faiva. O le mea lea, malo faafetai.

Ia, ua ou vaai atu ua lata le tatou taimi malolo. A tulai mai foi se isi sui usufono ona... ona i ai lea o le manatu, ia o lea o le a tatou malolo mo le taimi lenei, ina ia lava le malosi o se tasi foi o sui usufono. E uma le tatou malu afiafi ua maua le malosi faafouina aua le faaauuina o le saunoaga. O le mea lea, ia sauni mai se isi tatou sui mo se isi taimi tatou te amata ai.

Ou te faasilasila atu ua faataatiaese Taulumaga a le Fono Aoao Faitulafono mo lana malologa e na o le 15 minute faamolemole. Faafetai.

Na faataatiaese Taulumaga a le Fono Aoao Faitulafono mo lana malologa i le itula e 3:35 i le afiafi ma toe faaauau i le itula e 4:05 i le afiafi.

FOFOGA FETALAI: Ou te faasilasila atu ua toe amatalia nei Taulumaga o le Fono Aoao Faitulafono.

Faamalo le onosai i le paia o le Palemene, atonu ua maua le malosi faaopopo e toe faaauau ai le tatou galuega.

E faataatiaese taulumaga o le Fono Aoao Faitulafono ua maea ona saunoa le sui usufono mo Satupaitea. Atonu o le avanoa lenei mo se tasi o sui usufono e fia saunoa.

Ia o lea ua matau atu ua fou mai le sa o le sui usufono mamalu mai Gagaifomauga Nu.1.

Afioga Auuapaau Mulipola Aloitafula (Sui Fofoga Fetalai): Lau Afioga i le Fofoga Fetalai pe maua se avanoa?

FOFOGA FETALAI: Ia, se i onosai mai lava le sui usufono mo Gagaifomauga se i tulai mai le Sui Fofoga Fetalai.

Afioga Auuapaau Mulipola Aloitafula: Ia faafetai mo le avanoa lau Afioga i le Fofoga Fetalai. E manatu o lea ua matu fau i le taliga o le sua i le Afioga i le Palemia, lau Afioga foi i le Fofoga Fetalai, alii ma tamaitai Minisita o le Kapeneta e faapea foi le la Itu i le Afioga i le Taitai o le Itu Agai, Sui Taitai ma le mamalu o sui usufono. Ia talu ai sa leai lava se agaga e faalavelave i le lauga matagofie a le usugafono a Satupaitea pei ona mau ai atu ae le i faia le tatou malologa.

Lau Afioga i le Fofoga Fetalai, ia ua fofoga maua le Maota, peitai, e i ai lava le saunoaga ou te lagona e au ia e le logomalie i lau faalogologo, o lea foi ua fofoga maua le Maota, ona o le faaiiuga o le saunoaga e faapea, ia, fai lou ivi, pe faapea foi, fai outou ivi. E mafai la ona faauiga e lou sui usufono, o le fai o le ivi e foliga mai o lea e fai toatasi agai i le Minisita o Tupe. Ae sa maua foi i lau faalogo, sa finagalo lava le sui usufono e le fia faia sona finagalo i le Tala o le Tupe. Ae a ou faauigaina foi i le faapea mai o le Afioga i le sui usufono le usugafono, fai tou ivi, e foliga e le logomalie lea faamatalaga.

Ou te faatu atu ai le lafo lau Afioga i le Fofoga Fetalai, *Pe mafai ona aveese ma faamaumauga o le tatou Fono.*

O le tamaliiaga lava sa tataua ona faapea mai pe saunoa mai foi, ia, tulou e le aoaia e Laupua Tamafaiga, alo i outou faiva le faigamalo. O se upu e pei o lea e gau ma ato mai i le faigamalo, po o fea lava e fai i ai ma tiutalaloa.

Ia o le lafo lea ma le faaaloalo lava lau Afioga i le Fofoga Fetalai.

FOFOGA FETALAI: Ia, o lea ua maua le finagalo o le... O ai se isi e faaluaina le finagalo o le lafo lea e faatu mai e le Sui Fofoga Fetalai?

Faaluaina e le sui usufono mo Lefaga ma Faleaseela.

Afioga Hon Lautafi Fio Selafi Purcell: Lau Afioga i le Fofoga Fetalai, pe maua se avanoa.

FOFOGA FETALAI: Ia masalo o lea ua tau maua mai le faamaumauga o le mataupu lea. Ia atonu o lea foi ua aumai e le sui usufono mamalu ona o le tulaga o faamaumauga, ona o le tulaga e moni lava e le o oo foi i ai se finagalo o lau Afioga pe le o le uiga foi lea, ae pei o se faaupuga. E pei o le uiga lena mo faamaumauga o le tatou Palemene lea ua mafua ai le lafo lea ua faatu mai e le Sui Fofoga Fetalai, ma ua faaluaina.

Afioga Hon Lautafi Fio Selafi Purcell: Ia, o le a faapea ia ona fai, ae o lena ua e saunoa sao lava, e mamao lava le agaga sa i ai. A o le mea lea ua faatu mai e le sui usufono. Se o mea lava e mama e mama, ae aveese pe afai e tonu ai tatou faamaumauga. Ma le faaaloalo.

Na faamaonia le lafo ma tulai ai faamaumauga o le saunoaga a le sui usufono mo Satupaitea ua aveeseina.

FOFOGA FETALAI: Ia atonu e leai foi se mea... o le mea pito sili lava ona taua, e leai, o lea foi na faamalulu mai le sui usufono mamalu, e tusa foi o saunoaga ma upu. Atonu foi o lea ua maua mai e le Sui Fofoga Fetalai lea tulaga, ae ou te talitonu lava e le o le agaga o le sui usufono, a o mea o faaupuga e fia tuueseina mo tatou faamaumauga.

Ou te iloa, o le a le afaina ai lava le tulaga o le agaga o le sui usufono ma lona finagalo faamaoni, ae ona o faaupuga lea ua mafua ai ona i ai le lafo ma o lea ua tuueseina ai ma tatou faamaumauga.

Ia ma le agaga faaaloalo, tulai maia le sui usufono mamalu mo Gagaifomauga Nu.1, o se tasi foi o tina matua, Hon Faimalotoa Kika Stowers Ah Kau. Ia saunoa maia.

Tofa Hon FAIMALOTOA KIKA STOWERS AH KAU (Gagaifomauga 1): Faafetai i lau Afioga mo le avanoa o lenei sui usufono mai Gagaifomauga 1, faafetai foi i lau Afioga ma le Matagaluega mo le faamalositino ua toe maua ai se faasiligamalosi aua le faauauina o le tatou galuega o faagasolo nei.

Ae ou te manatu o le a le toe gaepua le vai o le Alii o le Itu, aua o le vai fai mai na gagalo ai Toga ae ola ai Samoa. O lea foi ua toia au i le ulia i le titi a tavaloa e pei o le taeao na afua mai i Finao. O le fesili, aisea? A lea ua faimalo toa tumua ma tuutuuloa ai le sa o le tamaloa Salafai aua ua aemalo ona faiva i Atua. E talitonu le manatu ma le mafaufau lau Afioga i le Fofoga Fetalai, o le tatou savaliga i ia masina ua mavae atu e le i faigofie. Ae o le faafetai i le Atua i Lona alofa ma Lona agalelei le mavae mo Samoa, a lea ua itiiti upu i mala ae tele upu i manu. O lea ua tatou laulaufesilafai i magafetausoifua i le lagimama ma le soifua matafi i lana tausiga faaauau. Le Atua le Tama o le alofa mutimutivale, o lau pule lea, ua malie o ua malie Malo, ua faasaō.

Lau Afioga i le Fofoga Fetalai, ou te talitonu o lau lauga faataupou muamua lea faa-Itu Agai, talu ona ou ofi mai totonu o le Palemene o lea ua 8 nei tausaga. O lea la e muamua ona ou faatulou i le afio o lau Afioga ma le paia o lenei Maota. E faatalofa aloaia atu ai ma faamanuia atu i lau Afioga i lou tulai mai, o se tasi lea o sui usufono mai le motu tele i Salafai i le motu fai mea mafai.

E faapena ona faafeiloai ma faatalofa atu i lau Afioga i le Palemia ma lau Kapeneta, ae le gata i lea o Afioga i Minisita Lagolago. E fatalofa atu foi i lau Afioga i le Taitai, lau Afioga i le Sui Taitai ma sui usufono mamalu uma o si a tatou vaega ua agaia nei le tatou Malo.

E faatalofa atu foi i le tapuai faafogafoga mai a Le Ao Mamalu o le Malo ma Lana Masiofo, lau Afioga i le Sui o le Fono a Sui Tofia ma lou faletua, lau Afioga i le Faamasino Sili, le Peresetene, Alii ma Tamaitai o le Faamasinoga.

Ae a le tapuaiga i susuga i Taitai o Ekalesia. Susu Susuga i Faafeagaiga ma o latou Faletua i so o se Fatafaitaulaga. Afifio ositaulaga ma le paia o le ituaiga sa ma so o se avefua o le talalelei o lo o faafalelemalu ma faafaletuluia ma faanonomanu aua se manuia o si o tatou atunuu. Ae a le tapuaiga mau a Samoa mai ona ao e oo i ona iu. O paia ia aua Tama ma Aiga, o Aiga foi ma Tama, le usoga a Pule ma Tumua, Itua ma Alataua, Aiga i le Tai ma le Vaa o Fonoti.

A outou Afioga i Ofisa Sili o Pulega o Matagaluega ma Faalapotopotoga Tumaoti a le tatou Malo. Malo le onosai, malo le tautua.

E le faagaloina nai o tatou uso i le motu i Sasae. Afio o lau Afioga i le Kovana Sili ma le Lutena Kovana, afifio Fono Faitulafono i Maota e Lua, afio lau Afioga i le Peresetene ma le mamalu o le Maota Mauualuga, afio lau Afioga i le Fofoga Fetalai ma le Maota o Sui, le Afioga i le Faamasino Sili ma le Ofisa o Faamasinoga, susu o lau Susuga i le Failautusi o Mataupu Tau Lotoifale, afifio afioga i Kovana Faaitumalo.

O paia lava lea aua le Faleagafulu, ia Sua ma le Vaifanua, Fofu ma Aitulagi, Ituau ma Alataua, Saole ma Saleaamua ma le Launiu na Saelua. Afio o le Laau na Amotasi, Faatuiolomotu ma Auvaa o Tootoo ma le mamalu i le Manuatele.

Lau Afioga i le Fofoga Fetalai, ae ou te le i sosoo se faamatalaga, ou te fia avea muamua si ou itumalo o lo o faafogafoga mamao mai. Ou te faatalofa atu i le paia mauualuga o le tatou itumalo. Ma ou te fia faaogaina lenei avanoa e molimoli atu ai le faafetai tele i la outou tapuaiga Gagaifomauga Nu.1. I le afifio o Sao e Fa ma Aiga Sa Umalau, le Atipouniu ma le Faasau, lau Fetalai i le Alii o le Itu lau Tofa Lavea ma le mamalu i le nofo a ituaiga ia Safotu.

Liliu le vai o Sinafatulua i le afifio o Taito ma ona alo, aiga Sa Umalau ma lau fetalai Tauasa. Le afaigaluega paia a le Atua o lo o faapena ona faafalelemalu ma faafaletuluia i Finao, o lo o faanonomanu ma faatulifegaui aua se manuia o si o tatou itumalo faapea Samoa atoa. Faafetai i lau Susuga i le Toeaina ma le faletua, a lua afioga Patele ma Patele, afioga i le Tiakono ma le faletua, le tapuaiga i Tamaitai Sa. Lau Susuga i le Tausi Matagaluega ma le faletua faapea lau Susuga i le Epikopo ma le faletua. Faafetai i la outou tapuaiga leleoa, la outou pogafala ma ulagamulila, o lea ua tupapa faiva o le gogosina ona o la outou tapuaiga, malo faafetai.

E le faagaloina le agaga faafetai i tama po o tuagane, vaeane mamalu sa sailia ai le filiga o si o tatou itumalo. Malo le finau faatamalii, malo le faatoatoa malo foi le fai o le faiva. O le tatalo, e moomia ma manaomia lo tatou tutu ma galulue faatasi aua se manuia o si o tatou itumalo.

Lou itumalo e, faafetai faafetai i lau puleto ma lau faaaloalo, faafetai tele i a outou Afioga, e momoli ai ia te outou i la outou tofa i le toe filifilia foi o au e toe avea ma outou sui e momoli mai la outou afioga ma la outou tofa i le fonousu a Samoa aua so tatou ai.

Nai ou aiga uma, o uo ma e masani, nai fanau uma i Samoa nei ma atunuu e mamao, e momoli atu le agaga faafetai, malo le tapuai, malo le tatalo, faafetai mo la outou lagolago malosi mai.

Lau Afioga i le Fofoga Fetalai, ae ou te le i see ese ma si ou itumalo ona o lea ua fai lau faaiuga, ou te faamalulu atu i lou itumalo pele o Gagaifomauga Nu.1, i le toatele o outou lea sa tuu valaau mai i le aso

ananafi i le afiafi ma le po. E faamalulu atu foi i e ua faasea mai i lenei taeao, ua tape lau telefoni, ae sa outou moomia ina ia ou faaleo outou manaoga ma outou leo e tusa ai o mataupu ua tutupu mai ia Samoa, ma o se taimi muamua lea ua tutupu ai.

Ou te faamalulu atu, ou te le faafinau pe ou te faatautee i le faatonuga a lau Afioga i le Fofoga Fetalai. Ma o lo o sisila fofoga o le Atua ma ati lana silafaga, o a tatou mea e fai i lenei lalolagi, o tatou loto, o tatou mafaufau, o tatou fatu ma o tatou agaga, pau lea o lou faatuatuga, sao po o le sese, tatou te faatuatua o lo o ati le silafaga a le Atua. E faamalulu atu ai i lou itumalo pele.

Ona ou see mai ai lea lau Afioga i le Fofoga Fetalai se i molimoli atu manaoga o lou itumalo. E puupuu lava nai manaoga o si ou itumalo. O le falemai, lau Afioga i le Minisita o le Soifua Maloloina, ou te faatalofa aloaia atu, ou te faamanuia atu i lou tulai mai, faamalo aemaise galuega fita o lo o feagai ma lau Afioga ma si a tatou Matagaluega aua le puipuiga o Samoa. E nofo lava ma le popole, ona o lea ua tatou molimauina ua latalata ma ua i o tatou faitotoa le Koviti-19 po o le faamai oti ua lofia ai le lalolagi atoa. O lea foi ua aafia ai si o tatou motu i Tutuila, aemaise o le tulaga pagatia o lo o i ai o tatou uso tuaoi i Fiti ma nai ona tagata. Ia tatou tatalo mo tagata Samoa uma o lo o i Fiti, e ua nonofo mau ai i latou ua faigaluega aemaise alo ma fanau o e ua tagi mai ala ua fia oo mai, le Atua puipui lo latou ola vaivai. E i ai se taimi matou feiloai i luma o le nuu ae le o tua o le nuu.

Na o se talosaga i lau Afioga i le Minisita mo seleni e pei ona ua maea ona maua mai i le Faletupe o le Lalolagi mo Paeaiga ua tuanai mo le faaleleia o falemai faaitumalo, aemaise fale e nonofo ai fomai. E talosaga ai mo le falemai faaitumalo i si o matou itumalo i Safotu. Pau lava vaega na faatuai ai ona o le faamuamua na ave i le puipuiga o le Koviti-19, aemaise o le faamalieina o nisi o aiaiga na moomia mai ai e le Faletupe o le Lalolagi ina ia manino ma malamalama ma alu sao tupe i poloketi o lo o aumai. E talosaga atu ai alofagia ina ia faagasolo lea polokalame, e le gata mo Safotu ae faapena foi i falemai i itumalo uma i Savaii, faapea foi Upolu nei.

Lau Afioga i le Minisita o Galuega, faamanuia i lou tulai mai. E 3 lava nai talosaga a lenei itumalo e tuuina atu i ou autafa. O le vaitaumafa o le nuu. O luitau o lo o feagai ma lenei itumalo, o le tuu taimi lava lea o le sua mai o le vai i Safotu, o le taimi ua ki atu le paipa o ola o le taimi... aemaise lava le taimi lea i le taeao pe a usu nai tamaiti i le aoga, ae le i momoe foi i le po, e faatutumu paketi ma ni ulu, tulou lou gutu ma le afi ina ia feala ifo o lo o i ai se vai e faapena ona faaaoga. O lo o i ai pea le faafitauli lea i totonu o si o matou itumalo.

E pei foi ona silafia a o matou nonofo mai foi i ina i lenei itu, e seasea outou faalogo o lauga se Minisita i ni manaoga o se itumalo, ae faafetai o lea ua aumai e le Atua le avanoa matou te faaleoina ai mea o lo o faapena ona moomia e nai o matou itumalo.

Lau Afioga i le auala i Manase, o le Paeaiga talu ai na maea ai ona maua mai le seleni mai le faletupe foi o le lalolagi e lata i le \$10 miliona sa faaagaaga mo le poloketi lea, ona o le taua tele o lenei auala e sopo atu i luga o Manase agai i Safotu, ina ne i meaane ua solo le tolotolo lea, o le vaiti ia o le auala ae tu, a maua ae solo ni pasi e omai le la itu, po o le a lava le taimi ma suiga o le tau o matagataga, o se otiga tagata, ma o le ala lea na taumafai ai ina ia maua se seleni aua le faaleleia o lea itu o le tatou atunuu. Faamolemole se i toe silasila ane.

Faafetai i le auala lea i Matavanu, le auala lea e tau o le auala i luga o le mata o le afi, si o matou itumalo i le matou nuu tele o Safotu. O lea ua amata i le la tausaga ona sua, ae o le talosaga i lau Afioga i le Miniita, o le toatele o turisi i le matou nuu pito mai o Manase, lena tout e silafia i le tou pasi atu pasi mai, tele o faletalimalo aemaise o beach fales. Matou te vaaia i le tele o taimi e faafafa ia ato a turisi, o faguvai, e tiga lava ona leai se auala ae asa, ona o le fia maimoa i lea mataaga. O se tupe tele e maua ona o le toatele o turisi i si o matou itumalo. Faamolemole ia faapena ona alofagia ia lea faamoemoe.

Ia ma le talosaga mulimuli lau Afioga i le Palemia ia po o le Minisita o le tatou Siosiomaga o lo o faasoasoina ia tatou taligalu. E muamua ona momoli atu ia moomooga lelei ma faamalo atu i lou tulai mai o lau Afioga i le Sao Faapito. O lo o vaaia pea le afaina pea o le Siosiomaga ona o le siisii pea o le suasami aemaise o faalavelave faalenatura o lo o lamatia ai foi ia lenei itumalo, masalo lau Afioga i le Palemia e te ono manatua sa o ta faasoa ai foi i le talosaga lava lenei a si ou itumalo ao aveia lau Afioga ma Minisita i lena vaitau, sa e faapea mai ia te au ou te sau e toe fai atu se tusi talosaga faatuatusi i le CEO i lena vaitau, avatu le kopi i lau Afioga.

Ia na ona ou talosaga ma le agaga faaaloalo, e oo mai i le taimi nei e le o le taimi muamua lea, ua fia o matou tofi lumanai atu o nisi la ua fai i lagi... ua ova ma le 30 tausaga o faatali, o tatali ma tapuai mai ia si o matou itumalo ua fafati galu i tuafale i tuamaota ma le agaga faaaloalo e valuvalusia ia aa o le fau.

Ia ona ou oo mai lea se i fai se faamatalaga a lenei itumalo i le Tala o le Tupe e pei ona taatia ai nei i luma Maota, luga o le Laulau a Fono a le Palemene. Lau Afioga i le Fofoga o le Fono e fiafia lava le agaga ua maua le avanoa o lenei itumalo e fai sona sao e tusa o le Tala Faatatau o le Tupe ua taoto nei i le Maota. E momoli le faafetai i le Afioga i le Minisita mo lenei tapenaga. Faamalo atu foi i lou tulai mai e tusa ai o filifiliga a lo tatou Malo ua i ai mo lenei vaitau.

Lau Afioga i le Fofoga Fetalai ma sui usufono mamalu o le Palemene, e tuuina atu le sao o lenei itumalo e tusa o le lauililiuina o le tamaoaiga o Samoa e ala i le Tala o le Tupe mo le tausaga faaletupe 2021/2022 i vaega nei. Muamua lau Afioga i le Minisita o le Soifua Maloloina ona o se tasi lenei o Matagaluega sa ou galue ai i le Paeaiga na tea nei. Ma o lo o tau maua i ai ma manatua pea ma malamalama i tulaga ia.

O Samoa o se tasi o atunuu o le lalolagi o lo o malupuipua pea ona tagata mai i aafiaga tuga o le pepesi o le faamai o le Koviti-19, ua aafia ma maliliu ai le faitau fia miliona o tagata o le lalolagi. Ina ua lalata mai lenei faamai i le Pasefika ia Mati i le tausaga na tea nei i le 2020, sa le i toe faatali ia le Faigamalo faapea le aufaigaluega galulue o lo o nafa ma le puipuiga i le taofia o femalagaiga e tapu ai le faimalaga mai o tagata e ese mai i taganuu o Samoa.

Sa faalauiloa ma faatinoina gaiouga e talafeagai uma e ala i le tapenaina o se stimulus package muamua sa faalauiloa ai le vaegatupe e \$66.3 miliona e fesoasoani i tagatanuu uma. O pisinisi tumaoti aemaise o se vaega faapitoa e \$20.2 miliona sa faaagaga mo le puipuiga o le atunuu mai i le faamai pipisi o le Koviti-19.

Lau Afioga i le Fofoga Fetalai, e lagona lou faanoanoa pe a matau atu i le Tala o le Tupe mo le tausaga 2021/2022, e le o i ai se vaegatupe faaagaga mo le puipuiga o Samoa mai i le Koviti. O lona uiga, ia tailo ne i tiga se finagalo, ae e tatau pea ona avatu ia o matou lagona po o manatu mamafa i ai lo tatou Malo ona o lea ua lata ina faaiuiu faiga a le Koviti, ma ua manatu nisi atunuu o lea ua fai ifo, ae e i ai ia le talitonuga, e ave pea ia le faamuamua i so o se taimi i le malupuipua o le atunuu.

O le mea moni, o le taimi e aupito sili ona lamatia ai tatou, e pei ona o tatou matamata atu i ai, lea e faafetai o lea ua ae le tofa o le a alu ia le tuiga i le Aso Tofi ma le Aso Faraile o le vaiaso nei. A o tatou matamata i le faagasologa o atunuu mamao, ua o tatou vaaia ua oo i tagata ua tai lua tui o la ua aafia. Ma o nisi ua maliliu ae e tele le avanoa i le puipuiga lea pe a oo mai ua kava e uma e tatau ona tui. O se tuualalo lea ina ia faapena e le tatau ona faatamala ma e tatau ona ave pea ia le faamuamua i le puipuiga o le atunuu i taimi uma.

Ua matauina i nisi o faasalalauga, se fuafuaga mo le toe tatalaina o tatou tuaoi po o borders i se taimi lata mai. O le tuualalo a lenei itumalo, faamolemole aua, aua lava ne i tatalaina ia o tatou tuaoi e faamalieina ai ia ni tagata toaitiiti e fia malaga mai po o nisi pisinisi turisi o talosaga mai, ina ne i maumau ai le soifua o le toatele o le atunuu, e moni ia le muagagana faa-Peretania e faalogoina pea e faapea, all it takes is one. E tasi lava le tagata e mai, ae aafia ma maliliu ai le toatele.

Lau Afioga i le Fofoga Fetalai, matau foi i le Tala o le Tupe, se fuafuaga i le faasopolia o taumafataga o le falemai mo falemai itumalo uma i totonu o le atunuu. Ia lau Afioga i le Minisita o le Soifua Maloloina, o se fuafuaga ua leva ona tapena foi e le Faigamalo ua mavae, ina ia tuuina atu lenei auaunaga mo i latou uma e faataotolia i maota gasegase mo mai tigaina. Ae a fua i faamaumauga o la ua taumamafa gasegase uma i o i Tuasivi, ae o lea o lo o faatuaituai ae sa tou silasila i tatou i nuu i tua ma matou mai i Savaii, o le tele lava o taimi e te alu atu vaai le fomai ua leai ni tagata e faataotolia. O le ala lena o le tuai ona faasopolia se i tulimatai aua foi o la e taoto o la e i

totonu o le nuu e faigofie ona o ta savalivali mai e ave le meaai a le mai.

Ae e tusa ai ma faamaumauga o le toatele lava e tasi le po pe le atoa foi se aso e taofia ai i maota ia e i ai ia nuu i tua ma matou i Savaii, i falemai i itumalo ae toe siitia pe toe tea i tua pe toe transfer mai i nuu i tua i le falemai i Motootua, ia po o le transfer mai foi i nuu i tua i falemai i nuu i tua, i i i le Maota i Tuasivi. Ma le faamoemoe maualuga e pei ona faataatia, siitia mai le falemai autu i le taulaga i Salelologa i se taimi lata mai, ma faatino loa le autu e ala i le fausia loa o se nofoaga faapitoa mo le tapenaina loa o taumafa, faatotogaina e ala i ogaumu ma masini mo le kukaina o meataumafa, faapea le saunia o le aufaigaluega mo lenei faamoemoe.

O lo o faatupulia pea le faitau o le mamalu o le atunuu i Savaii, ia ma ua faapena ona manaomia le toe faatulaga o se isi falemai autu e tautuaina ia si o matou motu i Salafai. Sa i ai le talitonuga ma le naunautaiga, o le a faapea ona tuuina i totonu o lenei Tala o le Tupe se vaegatupe e amata tapena ai se falemai tele i Salelologa. Ia ae o lea e matau atu, ia e le o i ai se fuafuaga a le tatou Faigamalo fou mo lea faamoemoe i se falemai i Salelologa. O lona uiga, talosia o le a le faamuta ai ma lea miti taua mo si o matou motu i Salafai.

Sa maualuga lava le faamoemoe e tele ni vaega fou po o ni manulauti fou o le a faalauiloaina ma faatinoaina e le Faigamalo ua tulai mai nei e lagolagoina ai le soifua maloloina o le atunuu, ae paga lea, o le tele o atinae autu, o lo o sosolo lava i galuega sa faapea ona leva ona faataoto mai ma faatulaga mai i le Faigamalo ua mavae nei, e aofia ai vaega e pei o le faamamaina o le falemai e pei ona i ai i le saunoaga a le Minisita o Tupe. Ia e tou te afifio mai i totonu ua leva ona pasia e le Kapeneta ma ua amata ona faagasolo ia le outsource ina e tuuina atu i tua i ai latou ma le agaga, aua e moi lava ae o le manatu na i ai, get the right people to do the right job.

O le tele o taimi e aumai ia faitioga e palapala le lelei ona... o la ua lelei ona fai ia lena tulaga. O lo o i ai foi la ia le \$3 miliona lea mo le faaleleia o falemai faaitumalo faapea apitaga mo fomai i tua e pei ona ou faailoa muamua. E faapena foi ona leva ona pasia e le Kapeneta ia le faatau mai o le masini faata po o le Scanner CT Scan lea na faalogologo mai na lauga ai nisi o sui usufono. Ua leva na taatia ia lena mataupu ae sa tuai ona o processes foi lea a le Tenders Board sa toe readvertise ina ia mautinoa e le MOF o lo o manino ma malamalama ona mulimulitaia ma e ua leva ona i ai ia le tupe mai i le tatou ACC.

Ia o nai tulaga ia e pei ona matauina, e le gata i lea lau Afioga i le Minisita o meatotino ma vailaau mo aso uma aua ua lelei fausia ma tapenaina se nofoaga tutotonu, le warehouse e teu ai vailaau ma meafaigaluega. Ia o nai mea na ou te talitonu ua maea ona pasia ae pei o lea e aumai i totonu o le Tala o le Tupe. Ia faamalo i lau Afioga i le Minisita mo le faaauauina o ia galuega lelei. Ia lea e vaai atu o lea e aumai i totonu o le saunoaga o le Tala Autu o le Tupe.

Lau Afioga ona ou oo mai lea i totonu o se tasi Matagaluega sa ou galue ai muamua atu ae ou te le i see i le Soifua Maloloina. O le Matagaluega o Tina ma Tamaitai ma Agafesootai, momoli atu le faamalo ma faamanuiaga i le tulai mai o lau Afioga i le Minisita. E tele faamatalaga e uiga i le \$51 miliona lea ua ou faailoa atu ou te le toe fia talanoa i ai ona o lea ua i ai le faatonuga. Ia ma o lena ua faafofoga mai Samoa ua faamuta ona toe afea i se lauga.

Lau Afioga, o lea e matau atu, o lo o i ai se vaegatupe e \$11 miliona i le Tala o le Tupe o le vaega o Tina ma Tamaitai ma Agafesootai, ma e ta te fesiligia i le agaga faaaloalo, po o le a le faaaogaina o lenei vaegatupe ia faapefea foi ona faasoasoina atu, pe tufatufaina atu i itumalo e 51 o si o tatou atunuu. O se fesili e fia malamalama lau Afioga i le Minisita. Afai o le agaga e faatinoina ai atinae faapea manaoga faapitoa a itumalo taitasi, ona ou manatu lea, ma lou faaaloalo tele, talofa e ia Samoa, ua 59 tausaga o faatino e le Malo ia polokalame, o lo o ave i ai le faamuamua a itumalo uma o le atunuu. O auala, o eletise o suavai taumafa, o faleaoga ia ma le faamuamua o aoga a le fanau, falemai ma togafitiga o gasegase faapea le auina atu o gasegase faapitoa i atunuu mamao, atinae o taaloga, penisiona o tatou matua tausii. O le totogiina o pili aoga a fanau o le Malo, ma le tele ma le lasi o polokalame faaauau sa manuia ai le atunuu, o le fesili faamolemole, e le o manaoga ia lea o lo o faamuamua e itumalo ma tagatanuu o Samoa ua leva ona faatino e le Faigamalo ua mavae nei? Ma le faitau \$100 miliona tala e faaluina i tausaga taitasi ae o lea ua faailoa le \$1 miliona tala e tuuina atu i nai itumalo e 51. E moni ai le upu, aua le naunau i le ia ae manumanu i le upega. Aua ne i o tatou faia ni faatosina e uunaia ai le paie ma le ola faamoemoe, ae ia o tatou ave le faataua i polokalame e manuia ai nai o tatou tagata, i le aso nei, o a taeao ma aso uma o le soifuaga.

O lo o i ai se polokalame o lo o faagaga ai ia le tupe e \$2.1 miliona, mo polokalame e faatino e Komiti Tumama. O lenei faamoemoe, e le o se polokalame fou, e pei ona muai faatino ai e le Malo ia Iulai o le tausaga na tea nei, e ala i se faamama avega e tusa ma le \$1.3 miliona, sa faamatuina atu e le polokalame o le stimulus package vaega lua e toe faatulaga ai ia Komiti Tumama a afioaga taitasi mo le faamoemoe e uunaia ai ia atinae a tina. Faaoga ai foi nei nofoaga mo polokalame a tuiga, a le fanau faapea le uunaia o le tumama lautele i nuu ma afioaga uma.

Lau Afioga i le Minisita, ia sa i ai lava le manatu maualuga i le umi o le taimi o tau tapena ia lenei Tala o le Tupe, ae e tele ia ni faiga faavae ma ni galuega tetele fou ua sauni ia le Faigamalo e latou te faatinoina. Ae e matau atu, ia o le tele lava o galuega o mea faaauau mai i tausaga e tele ua tea, ia ma faasolo mai ai i lenei taimi. Ma o se lagona lea, ia o tatou manatunatu i ai ma o tatou tuufaatasia, i galuega o le a faapena ona faataatitia mo se manuia lautele o si o tatou atunuu.

Atonu foi i lau Afioga i le Fofoga Fetalai, o lo o tatou faitau eseese i le fesoasoani e \$250 miliona ua tuuina atu i Faalapotopotoga Tumaoti i lalo o le Tala o le Tupe. O le faigapaaga a le Malo ma le Vaega Tumaoti po o NGOs, ua leva tausaga o faaauauina pea e le gata e tuuina atu ai ia fesoasoani tuusao a le Malo, i ana paaga mo auunaga e faatino i tausaga taitasi, ia ae o lo o avea foi Faalapotopotoga Tumaoti ma sui auai i totonu o Komiti eseese a le Malo. Mo se faataitaiga...

FOFOGA FETALAI: Ia e na o se fautuaga i le sui usufono mamalu, talu ai ona o tatou Tulafono Tumau e le faatagaina ona faitau ia tatou lauga, ia ae ua maea foi ia le 30 minute a le sui usufono. Ia faauma maia le saunoga ia ona o tatou Tulafono Tumau e.. lau Afioga foi o le sui usufono ua leva...

Tofa Hon FAIMALOTOA KIKA STOWERS AH KAU: Lau Afioga ou te le teena ia lau... ia ae o uiga ia o le faamaumau o upu e faigofie ona kiliva atu ai ma le galuega sa o ta... mo le lelei. A lea ua tuualalo lau Afioga ma.. tagi lou loto ma lou mafaufau ae faali lava le ata, i le malu o le aumaiga e lau Afioga i lo tatou galulue faatasi. Ua ou sauni e tuu atu pasene e 500 lea e... i taimi uma.

FOFOGA FETALAI: Ia faauma maia lau saunoga....

Tofa Hon FAIMALOTOA KIKA STOWERS AH KAU: Faamolemole, a e lava tapena, e aanoa foi se mea e faafofoga mai i ai lou atunuu ma nai o tatou tagata. O le ala lea o le faamaumau lelei ina ia manino ma malamalama ae e le faapea o upu lea ou te fai atu ai. O lea e tusitusi i lalo major points o lea ou te fia kiliva atu, ona e pei o lou talanoa atu i le amataga o Matagaluega ia sa o ta galue ai i le tausaga na tea nei.

Faamalulu atu i lau Afioga ae usitaia lava se mea e te finagalo i ai. Ia ae o lo o auai foi ia Tumaoti nei i komiti eseese ia o le Malo mo se faataitaiga o le Komiti o le Civil Society Support Programme le CSSP. E faapena foi ia Komiti Faatonu i Poloketi tetele a le Malo o lo o i ai ia o latou leo e fai ai tonu mo se manuia lautele o le atunuu.

O lau tuualalo lau Afioga i le Minisita o le Matagaluega se i toe silasila ane i lenei talosaga, po o talafeagai pea. Ae pe faapefea ona vaevaeina i le tele o Faalapotopotoga Tumaoti o i ai nei? Ae pe o i ai foi ia ni taiala ma faavae mo le faamatuina atu o nei vaegatupe. Ia ona o lea o le a faaiuiu atu lau Afioga i le Fofoga Fetalai, ona ou oo mai ai lea i totogi o Pulenuu o le a siitia ma o lo o aofia ai i totonu o le \$11 miliona lea na ou taua ua faailoa mai i galuega ma atinae a le itumalo. Ou te faafetai i le tofa ua ae e toe faatulaga ai totogi o Pulenuu, ae o le fesili ma le agaga faaaloalo, pe mafai ona faailoa mai le siitaga o totogi o pulenuu. Ae pe o aofia ai ma sui tamaitai o tina ia silasila mai, e na o

au o lenei itu lea e agaia ia lena itu, o lo o fai ma sui o tina ma tamaitai o Samoa.

E pei foi ona faafesili mai lea ua o matou faalogo atu o lea ua taua mai Pulenuu pe o aofia ai matou ae faafetai lava o lea e aofia ai ma tina ma tamaitai. O se tasi lea o vaega tele o le atunuu o lo o fesoasoani i le faatupuina o le tamaoaiga totonu o aiga, totonu o Ekalesia o nuu ma afioaga i so o se mea o tina ma tamaitai. E pei lava ona i ai ia le matou faalupega, o le pae ma le auli, faufautua ma tuualalo. O nai au fesili na, o i ai se siitaga mo latou? Ae pe fia foi o le a siitia i ai?

E taua ia le faamanino mai, ina ia manino le faaaogaina o le \$11 miliona aua e matau atu, e faitau miliona miliona manaoga o le a faasee atu i le polokalame lenei, ae e na o le \$11 miliona lea e vaai atu i ai. I lau vaai atu la i lenei vaegatupe e uma lava ona faaaoga i ni itumalo se tolu pe fa, ae pe faapefea la le isi 47? O itumalo o faatalitali mai ma tapuai mai.

Lau Afioga i le Fofoga Fetalai o lea o le a faamaea atu, e auala atu i le Minisita o Tupe o nai motugaafa na, e tuuina atu aua lo tatou sa e fau faatasi. O le agaga o lou nei sui usufono, ia manino ma malamalama tulaga uma o le tatou tamaoaiga. Ia aua ne i i ai se tasi e tuuvaleina po o se itumalo e le faatauaina lona sao i upufai o le Malo, aemaise o le lufilufiina o le tamaoaiga.

Ia lau Afioga i le Fofoga Fetalai ma le mamalu o le Fonotaga, o le a faaiuiu atu ia se manatu o lenei itumalo. Ae ou te e pei ona ou fai atu, i le matou tofi o le pae ma le auli, ese lou ootia i le taeao o le Aso Faraile na tea nei i le malu o le siufofoga na e auina mai ai le feau tatou galulue faatasi, tatou faamagalo, ma o tatou faagalo.

Lau Afioga, o la e sisila fofoga o le Atua, ese le faigata le matuitui, le oona, le tiga o lagona na o matou lagona ai. O lea ou te ita i le alii lea lo matou failautusi tulou lau Afioga Lealailepule, na nofo ma pue ta ita la e ta te saofai i lalo. Paga le tiga o le... sina nofoa mai i o i le tatou fale la le e faasa, e faasa mea uma. Sina faguvai na aisi atu i ai e faasa. Ae o la e tau faatali o la e poloka e leoleo ia le taavale mai Petesa e aumai se faguvai mo matou. Aisea ua faapea ai? Se tulaga e momomo le loto, fetagisi mai o matou aiga mai i fafo. Ou fai atu ua a? O le a le mea ua outou fetagisi mai ai? Ua ou ready ou te alu e loka au mo Savaii atoa. Aua tou te toe fai mai. Ia pei e...

FOFOGA FETALAI: E faamafanafana atu i le sui usufono mamalu.

Tofa Hon FAIMALOTOA KIKA STOWERS AH KAU: Lau Afioga a avatu lava i fafo, ia e faapena ona malie le loto ma tatalo pea, ia faamagalo. Tatou galulue faatasi, ae e ese le faigata, e le mafai ona galo. E le mafai ona galo, a faafefea ona galo?

Ou te manatua lava le faifeau na fai lotu, ina ua uma le Aso Lulu na ia taua o le Aso pogisa lenei mo Samoa. Ua o tatou tuuina ifo ai i lalo o le tuugamau le tatou faakerisiano lea ua faavae ai tatou.

FOFOGA FETALAI: Ia se malie ia le sui usufono o lea ua faauma atu ia le tatou mataupu.

Afioga Masinalupe Makesi Masinalupe: Lau Afioga i le Fofoga Fetalai..

FOFOGA FETALAI: Ia, ua toe faalavelave le sui usufono mamalu.

Tofa Hon FAIMALOTOA KIKA STOWERS AH KAU: E i ai sa ta mea ua sese? Ae o lea ua faaali o ta lagona ua uma.

FOFOGA FETALAI: Ia, malie ia le sui usufono mamalu o lea ua faauma mai lagona o si sui usufono le Afioga ia Faimalotoa... Ia saunoa

Afioga Masinalupe Makesi Masinalupe: Leai o si mea lava lea e fia... ona o lea ua taua ia le Susuga i le faifeau. O lea foi e lagona le faanoanoa i le vaega lea, ona e manatu e le o tulaga lelei foi ia le matou aiga, ona o lea ou te lauga i totonu i i, ae la e tootuli i fafo i o le faifeau. Ae o le nephew o au, e pei o le mea lea e tau matau, e le aoga ona toe oo i ai ni saunoaga i lea vaega ma le faaaloalo lava.

FOFOGA FETALAI: Ia o lea ua maua le agaga o le sui usufono mamalu. O le lagolago atu foi ia oe le sui usufono mamalu o lagona o lena aso, ae o tatou faatea o lea ua uma ona fai ia le tatou tala. Ia tatou faatea i mea ua tuanai.

Tofa Hon FAIMALOTOA KIKA STOWERS AH KAU: Ia, faafetai, faamalulu atu i lau Afioga. E leai ou te le o talanoa i le faifeau lea.

Afioga Sulamanaia Fetaiai Tauiliili Tuivasa: Lau Afioga i le Fofoga Fetalai e na o sina mea e fesoasoani e faasao, pe mafai se avanoa?

FOFOGA FETALAI: E te faauilavea ia ai Sulamanaia? E te faalavelave ia Faimalotoa?

Afioga Sulamanaia Fetaiai Tauiliili Tuivasa: E a ioe, o se mea e fia faamalamalama. O la ua saunoa le sui usufono la e faalavelave

FOFOGA FETALAI: E leai e le faatagaina ona e faauilavea i o...

Afioga Sulamanaia Fetaiai Tauiliili Tuivasa: A faapea e lagonaina o lona nephew la e tootuli, o le a le mea na le susu ai i fafo?

FOFOGA FETALAI: E leai, alaala mai i lalo le sui usufono. O le a tele ai le... ia faauma maia le saunoaga Faimalotoa. O lea ua faaiu mai ia le saunoaga ia oe le sui usufono matua o le tatou Maota.

Tofa Hon FAIMALOTOA KIKA STOWERS AH KAU: Ia o lea ua ou usitaia lou finagalo, o le a faaiu atu se faamatalaga. Ae faamalulu atu lava i le sui usufono, leai e le o lem nephew lea e... o le faifeau na fai lotu, na tutulu ona fofoga ma... ia ae ua lava ia i i, ua lava. Ia ae e oo mai le taimi e tuu ai au i le tuugamau e le galo ia te au.

Ae faamanuia i lau Afioga, lau Afioga i le Fofoga Fetalai, ia ona maea atu ai lea o se leo o lenei usugafono. Faafetai tele i lau Afioga i le Fofoga Fetalai mo lo matou avanoa. O le a foi se faafofogaaga a si ou itumalo ma Samoa i se upu ua le tautamalii, malu ave i fale i so outou finagalo se vaivai o le auauna mai i Gagaifomauga Nu.1.

Lau Afioga i le Fofoga Fetalai, lau Afioga i le Palemia ma le Kapeneta, o lena ua momoli atu manaoga ma se sao o lenei itumalo. Faamanuia le Atua i lena itu faapea foi le Taitai ma lenei vaega faaupufai. Faamanuia foi le Atua i le tapuaiga ma le fita faafogafoga mai o Samoa uma, e le gata i Samoa nei, ae o Samoa uma o alaala i atunuu mamao. Soifua ma ia manuia lau Afioga i le Fofoga Fetalai.

Na faaalua le agaga fiafia o le Maota i le patipati o latou aao i le maea ai o le Saunoaga a le Sui Usufono mo Gagaifomauga Nu.1.

FOFOGA FETALAI: Faamalo saunoa i le sui usufono mamalu mai i Gagaifomauga Nu.1. Hon Faimalotoa, ia o lea foi ua lagonaina e le Maota le tanoa ma le saunoaga. Ia atonu foi o lea ua maua ia lagona tuuina mai foi i le Maota aemaise foi ia le sao mo le tatou Tala o le Tupe, ia o lea ua maua atu e le Palemia ma le Kapeneta, ia nisi foi o galuega o lo o e faufautua mai ai, aemaise le manuia o si ou itumalo. Ia malo lava le onosai, faafetai foi mo le sao ua tuuina mai. Ia, o le taimi lenei mo se isi sui usufono.

O lea ua ou matau atu o lea ua fou mai le sa o le Afioga i le Sui Taitai mai Anoamaa Nu.2, Hon Lauofo Fonotoe Nuafesili Pierre Lauofo. Ia, lau Afioga i le sui usufono mamalu.

Tofa Hon LAUOFO FONOTOE NUAFESILI PIERRE LAUOFO (Anoamaa 2): Faafetai mo le avanoa i lau Afioga i le Fofoga Fetalai. Ou te talitonu o lo o taoto i le agatonu le pale o le talalelei i lenei itula o le afiafi ona o le tala o fusi o le tautiaga e ala i le taulaga osia i le taeo ua tea, a o paia foi o sa ma faiga o le atunuu, e talitonu o lea ua taoto i paga e ala i lau saunoaga matagofie i le taeo ma le taimi ua sola.

Ou te manatu o lea ua maea la ona utupupu le vai ma mapu i le sasaga, ma o le a le toe oo foi la i ai se gagana. Ae ou te faatalofa atu ona o le Fono muamua foi lenei a lou sui usufono i lenei Paeaiga, le Paeaiga Lona XVII i lau Afioga i le Fofoga Fetalai o le Maota. E faatalofa atu

foi i le Afioga i le Palemia, le Sui Palemia ma lana Kapeneta ae faapea foi le afifio o Afioga i Minisita Lagolago.

Ia, liua le vai o le tamaitai i lenei itu o le Maota, eetai le afio o le Afioga i le Taitai faapea foi sui usufono mamalu. A matau mai lau Afioga i le Fofoga Fetalai. I le Paeaiga na tea nei, toe lava o au le sui usufono lea e totoe i luma o le laina lea, lea e molimau mai Olo ma Leatinuu ma... a o le matou vaega uma lea, sa i le itu le la. O le mea la lea, e fetau ma talafeagai lou faapea atu, ia afifio maia ma tala mai aao. E ese le matagofie foi o lenei itu. Ia e pei foi ona saunoa le sui usufono mai Satupaitea, i le manaia o le matamata atu foi i Afioga i Ofisa Sili o Pulega o Matagaluega, o lo o afifio mai luga i o i le la itu o le tatou Maota.

Ia, auauna tofofi a le Atua ma ositaulaga, malo e galulue punouai faalausautia o tausoaga i le atunuu e ala i outou tofi mai le Atua. Le Ao o le Malo ma lau Masiofo, malo le faapalepale, soifua manuia, faapea foi le soifua manuia i lau Afioga i le Sui Tofia ma le faletua.

Le tapuaiga a Samoa, ua faamalo le folau. E momoli le faafetai ma faamuaina se faafetai e tusa ai ma le Tala Faatatau Autu o Tupe muamua o lenei foi Paeaiga 2021/2022. Lau Afioga i le Fofoga Fetalai, e tele lava manu o le lauamanu ae ua manatu o le a tuli ia na o le manu ua faasee. O le mataupu ua ave i ai le faamuamua ma le faataua i le Tala Faatatau Autu o Tupe, o le soifua manuia o tagata o le atunuu. Ua o se mataupu taua tele. Ae i ai lou talitonuga, o le soifua manuia o se atunuu, e fesootai lelei ma le tamaoaiga lelei ma le malosi. O le siitia foi o le tulaga o le soifuaga, e faamoemoe lea i le lelei o le tulaga o le tamaoaiga, siitia i se tulaga gafatia ma le lelei mo tagata lautele.

Mai i tausaga ua tuana'i atu 2 pe 3 pe a, ia lea ua maea ona sausaunoa nisi o sui usufono e tusa ma ni faailoilo e pine ai le tulaga lelei o le tamaoaiga pei ona i ai le aso. O le tulaga o nogatupe a le Malo, ia o lea sa saunoa nisi o lalo ifo o le 50% o le tatou tamaoaiga po o le 48% pe a, o le official public debt. O le tupe o lo o i lalo ifo o le 20% o tupe maua po o le debt servicing. O tatou foreign reserves o lo o taoto i se tulaga lelei, e sili atu i le \$500 miliona e maua ai ma kava ai oloa e auina mai totonu o le atunuu e oo atu i le 8 masina. O nai faailoilo ia o lo o aumai totonu o tatou tusi ia mai le Tala o le Tupe, o faamatalaga o fuafuaga mo Tupe a le Malo, e faapea foi le vaega lea o isi tusi ia o le Tala o le Tupe pei ona taoto nei i le Laulau a Fono. O lea ua ou matau atu, faafetai i le fuafuaga, o le a ou amata mai le vaega lea o lo o aumai i lalo o le Matagaluega o Tupe.

Faafetai o le a maua se fesoasoani mo latou o maua manaoga tumau, o le tulaga lea o lo o moomia lava, aemaise o le a maua se fesoasoani tele i aiga mo le tausiga o latou nei. Ia, ae ia sili ai foi ma siitia se tulaga aemaise o tulaga o latou talavai mai le falemai. Ia faamalo foi le manatunatu i mea lelei. Ae o lou lava sui usufono, ou te fia malamalama i le uiga o le upu manaoga tumau, ina ia manino ma tonu ai ituaiga manaoga tumau o lo o manaomia pe agavaa i lalo o lea foi

ituaiga fesoaoani, ae fia foi se vaegatupe e maua e latou, pe totogi masina pe totogi vaiaso po o le a lava le faiga. Ina ia faapulapula mai le tatou polokalame fou lea, aua foi le silafia e le Maota nei ma le atunuu o lo o faafogafoga mai, o lo o i ai nai o latou uso foi, o tuafafine po o matua foi o maua i manaoga tumau.

Faafetai foi i le vaega lea ou te vaavaaia tu iai i le vaegatupe mo le fausiaina o fale mo i latou e lima vaivai. E i ai le polokalame sa faaauau mai i isi tausaga faaletupe ua tuanai sa tuuina atu i le faalapotopotoga o le ADRA, o le faalapotopotoga i lalo o le Ekalesia Asofitu i Lalovaea. Sa faasolo mai ai le polokalame lea i le taimi, oo mai i le tausaga na tea nei, sa fausia la mea o fale foi nei o apitaga mo mea o afioaga i aso e tulai mai ai faalavelave faalenatura e pei o afa ma nisi faalavelave faalenatura e tulai mai. O lea ua matauina ua siitia le tupe mo lea fesoasoani, ae pei e foliga mai pe sao lau vaai o le fesoasoani lea ua amatalia nei o le agai i mea o fale nofo o aiga lima vaivai. Pe o le sao lea o lau matau atu i ai.

O le fesoasoani foi mo tulaga tau le tuufaatasia o lipoti faaletausaga a faalapotopotoga ma Matagaluega, o lea ou te talitonu e leai se faaletonu i le vaega lena. Ona o lea ou te molimau atu ona o au sa ou taitaifono i le isi Komiti Faa-Palemene i le Paeaiga na tea nei, o lo o up to date uma tulaga o le tele o Lipoti Faaletausaga nei.

Sa taua foi ma afea i saunoaga a nisi o sui usufono le polokalame lea ua faatulai mai o le Full Forensic Accounting Assessment a le Malo, ona o lo o fesilisili lou mafaufau, atonu o se taimi faamalamalama mai e le Afioga i le Minisita po o le a le mafuaaga e manaomia ai lea polokalame. Aua e pei e foliga mai o tausaili ni seleni ua leiloa, pei e tau faapena lau vaai atu, ae o se taimi faamalamalama ia vaega ina ia manino le tulaga e faaaoaga ai ia seleni. A o lea foi ou te malamalama, o le tele o tusi a tatou Faalapotopotoga, o lo o sue nei e mea o kamupani suetusi tumaoti i le private sector. Ae afai o le polokalame lea e agai tonu na o Matagaluega, ia manatua foi, o lea e i i uma i totonu o le Matagaluega o Tupe vaega uma ia.

O le soifua maloloina, e matau atu o lo o i ai vaegatupe mo le faaleleia o falemai faaitumalo. O le falemai faaitumalo i Anoamaa, sa i ai le ioega a le Malo o le a sifi e le mamao lava se mea e sifi i ai, o i i Saoluafata, ona o le tele o le fanua lea e avanoa i Saoluafata e mafai ona sii i ai. A silasila lau Afioga i le falemai i Anoamaa, e fai lava si vaapiapi o le fanua la e i ai. Ae i ai foi isi auala vaapiapi e agai i tua e le tu auala foi. Ae se i silasila ane, e pei na mafua ona toloa faamoemoe ia, ona ua tulai mai le Koviti-19. Ae tau ina ou faapena atu ma toe faataatia atu i autafa o lau Afioga i le Minisita, se i toe silasila ane i ai faamolemole. E tele auaunaga po o konekarate ia o lo moomia i le tatou falemai, e i ai mea o security services. E pei lava o le falemai lava ia sa i ai latou securities, a o lea ou te vaavaai atu pei o lea o le a faakonekarate i tua. O le cleaning, faamamaina o le falemai, moavao. O le fesili i lau Afioga i le Minisita, po o le a le faiga lea o le a fai ai tatou

konekarate ia, aua e i ai le isi kamupani sa talanoa mai ua faamuta faafuasei le latou auunaga, po o le faiga lea tatou te sosolo pea i luga o le faiga o lo o i ai nei faatauofoga, po o le tauofo mai o kamupani ia pe i ai se isi faiga fou o le agai i ai le tatou Matagaluega ma le Malo.

Faafetai mo le polokalame lea ua ou vaai atu i ai, e fuafua mo le toe foi mai, ia atonu po o le toe tosinaina o fomai, o alo ma fanau a Samoa, o fomai pasi o lo o galulue i fafo e toe foi mai Samoa e galulue e tautua le atunuu. O alii ma tamaitai fomai, ia o lea foi ou te vaai atu e pei lava o lea e aofia ai ma tausisoifua.

O se fuafuaga lelei aua o lea lava e manaomia e tatou fomai. Ia ma ni fomai sili ma le lelei aua o lenei foi vaitau ua siisii lava i luga le tulaga o tomai fou ma le sailiiliga o isi vaega o tatou mo gasegase eseese e aafia ai le tatou atunuu ma le lalolagi. Atonu e fesoasoani lea e tuuititia le tupe, o lea ou te vaai atu e \$8 miliona mo mea o pili o falemai i fafo, lona uiga ai o gasegase ia e auina atu i fafo.

O tatou aso malolo e lua lea foi sa saunoa i ai se tasi o sui usufono, le tootoo lea ua mavae atu, le Koviti-19, lua aso malolo e faagasolo ai le tatou tuiga, o le vaiaso nei, le Aso Tofi ma le Aso Faraile, ia malo faafetai mo lea fuafuaga lelei, aua o le mea lea e moomia. A o le tulaga lea e faafesili atu ai, o tatou vailaau, o vailaau lava e pei e foliga mai o lea foi e saua i le faalogo e i ai vailaau ia ua lata ina le aoga, expire, po o le tulaga lea ua i ai tatou, po o le mafuaaga foi lea ua fai ai tatou aso ia malolo se i tau faagasolo le tuiga i totonu o le atunuu. O le popolega lava lea pei ona fofogaina e nisi foi o sui usufono mamalu o le Maota, ia ua latalata lava le Koviti-19 o lea ua i Tutuila foi. O Fiti foi ia ua tulaga mai i se tulaga pagatia. O lo o taumafai Fiti e foia le mataupu lea ma le faamai, ia a o lo o faigata tele le tulaga ua i ai.

Lau Afioga i le Minisita o Faatoaga ma Faigafaiva, o lea ua ou vaai atu ua leai ni tupe faaagaaga mo le tineia o le tatou manuainiu i lenei tausaga faaletupe, ae ou te molimau atu, o lo o fai lava si tele o manuainiu i le matou itumalo. Se i toe silasila ane i lea vaega. O lou lava ia taofi e tatau lava ona faaauau le polokalame lea, o lo o tele pea le manuainiu i lau vaai, aemaise lava i i le matou itumalo. O le faaaliga faatoaga o se tasi lea faaaliga e fiafia tele le tatou atunuu e maimoa ai i tausaga taitasi. O lea la ua ou vaavaai atu ua i ai tupe faaagaga mo le faamoemoe lea, a o le fesili ia pe fia ni aso, ae pe ese foi se faaaliga a Savaii ese le faaaliga a Upolu, ae po o le a foi se taimi o fuafua e faatino ai lea faamoemoe. Ia mo le silafia foi e le aufaifaatoaga a lenei itumalo ina ia tapenapena ma sauniuni i ai.

O le export authority pei ona aumai i le Matagaluega o Faatoaga, atonu e le o se mataupu fou lenei mataupu lau Afioga i le Fofoga Fetalai. Ua leva foi ma tausaga o fefulifulisai i ai mafaufauga o totonu o Matagaluega a le Malo po o le a tonu, pe faatu ae po o fea foi e faatu ai, a o le a foi le Matagaluega e tatau ona gafa ma le vaaia o le export authority. Sa i ai le finau ma se manatu i tausaga ia ua tea atu, e tatau lava ona i lalo o le Matagaluega foi lea o Fefaatauaiga, po o le tatou

Ministry of Trading. Peitai o lea ua matau atu o lea ua i i i le Matagaluega o Faatoaga, ia masalo ai ona o se fuafuaga foi lea e faapitoa lava mo mea o fua o faaeleelaga a le atunuu. O se galuega e fesoasoani atili. A o nei lava fuafuaga, ia manatua foi sa i ai lava tatou boards i na mau aso, sa i ai le PMD sa i ai le Copra Board, sa i ai le tele o isi mau boards mo faamoemoe ia sa i ai i na vaitau e auina atu i fao fua o faatoaga. Peitai pei sa i ai se manatu na tulai mai i le taimi ua lata mai, e lelei lava le ave i le private sector, ave i le vaega tumaoti e nafa latou ma tulaga ia e faafaigofie ai ae faasee ese atu ma le Malo. Ia o lea foi la e pei ona silafia o lea la e i ai le tatou fanua foi lea po o le fale faatau i Aukilani, pei lava o i ina i Otahuhu na e i ai, i lalo o le vaaiga a le STEC, o se fuafuaga lelei tele lena fuafuaga ma o lo o faapena ona tulai mai i se tulaga lelei ma fua o faatoaga foi o lo o auina atu i ai mo le faatauina i Aukilani. O lo o i ai foi le tatou pack house i Nuu. Malo faafetai. O vaega uma lava ia pei e fesootai ma le vaega lea, a o lea foi ou te matau atu i lau Afioga i le Minisita, e pei o lo o aofia i totonu o le polokalame po o le poloketi lea a le SAFPROM le tulaga lea o le maketiina o mea o fua o faatoaga. Ae se i silasila i vaega ia, aua pei o vaega ia o lea ou te talanoa atu au ia i ai. Ae se i vaai po o le a le tulaga e sili ona lelei.

O le tatou SROS, ua tele tausaga o taumafai mai isi mau oloa eseese, a o le fesili lava ia po o i ai nisi tatou oloa fou o fuafua e gaosi. O le auaunaga a le SROS, e faafesili atu i lau Afioga i le Minisita, i le tulaga foi lele o le faaaogaina o le SROS mo suesuega o mea o fualaau faasaina ma vailaau faasaina o lo o ulufale mai totonu o le atunuu. E tele isi fulaau faasaina pei lava ona silafia o lo o faasalalau mai luga o le TV ma leitio, e maua i tai i le tatou tiute po o le border. O vaega ia e tatau ona tatou puipuimalu i ai. A o i i i le tulaga lea ua taua ai le border, ua leva ona taua le tulaga foi lea o tatou x-rays mo mea o containers lea e faapea ua le o toe mamao se aso taunuu mai, po o le a se fuafuaga o i ai le tatou x-ray lena po o le scan lena e scan ai mea o pusa oloa ia tetele. Aua e le taumate o i ina o lo o sao mai ai i le atunuu nisi foi o faiga faasolitulafono o nisi oloa faasolitulafono.

Lau Afioga i le Minisita o Pisinisi ma Alamanuia, o lea o lo o faaauau ma ou vaai atu i vaegatupe ia mo le faaauauina pe faavae ai foi le komisi lea o le competition ma le consumer protection. O le a se silasila a lau Afioga aua o lea foi e i ai le faagaoioi i le taimi e tasi le tatou price control board po o le a le komiti foi lea e faatulagaina le tau o oloa. Ua maua se faaiuga mautu a lau Afioga i lena tulaga i le faaauauina, aua e pei e foliga mai e le mafai ona faaauau faatasi mea na e lua. A o le tatou Komisi lea o se Komisi taua, ae manatu tele i le tulaga e le faigofie le mea lea o le competition commission, ona e tele foi le tomai faapitoa o i latou e tatau ona fai ma sui auai o komisi ia aua e le faigofie le agavaa manaomia, Codex Committee, o lo o vaaia le tulaga saogalemu o oloa e aumai totonu o le atunuu ma le tulaga foi lea o mea o labels ma tulaga o oloa ia e aumai, e tele isi oloa fou ia e aumai

e leai se gagana igilisi o i ai, e le o malamalama tonu po o a mea la e i totonu o isi oloa na. Ae se i silasila ane, aua o lea ou te vaai atu o la e i ai vaegatupe ia e faagaioi ai Komisi ia ma Komiti e pei ona i ai ma le tulaga o le standard. Aua o latou ia e tatau ona faatulagaina standards o oloa.

E faapea foi oloa e gaosi i Samoa, e pei lava ole fuamoa lea e maua i Samoa lea ua i ai le latou standard, a o isi oloa, lea e pei e faafesili atu ai lau Afioga i le Minisita.

Ia, o le tatou RSE, le polokalame lea o le RSE, pe le maua se avanoa foi lea e toe tatala teisi atu ai nisi ituaiga matata po o matafaioi ina ia aofia i totonu o le polokalame lea aua o lea e pei e tele lava o le vaega foi ia o nai tagata ia e o e piki mea o fruits. Ia o lea la e i ai le vaega foi lea pei ni kamuta lea sa ave foi i Niu Sila, e i ai ma nai tagata ia sa ave masalo po o Ausetalia i le tulaga foi lea o le hospitality industry mea o galulue i faletalimalo po o faleaiga. Ae a maua se avanoa e tau talatala atu ai nisi ituaiga agavaa po o nisi matata ia ua manaia tele. O le naunautaiga lava foi lea o le maua o avanoa o galuega e galulue ai ma malaga atu ai o tatou tagata i fafo. Aua e le o po se lilo i lenei vaitau, o lo o manaomia lava ni avanoa faigaluega i le tele o tatou tagata aemaise lava i totonu o Apia nei.

O le tatou Matagaluega o Aoga, lea foi sa taua e nisi o sui usufono, ua toe pau i lalo le tupe faaagaaga mo le Matagaluega o Aoga i le tausaga faaletupe lea o le a amatalia i lalo o le Tala o le Tupe lenei. O le Tala o le Tupe na tuanei e \$18 miliona a o lea ua pau i lalo o le \$17 miliona, a o lea foi e aumai i totonu o le saunoaga a le Afioga i le Minisita o Tupe, o lea o le a sii totogi o faiaoga.

Ia, e fia malamalama le sui usufono po o le a se fetuunaiga lea o le a fai i le tulaga lea aua o lea e pau i lalo le tupe faaagaga mo le Matagaluega i lenei tausaga faaletupe. O lea foi e maua i le faalogo o lo o i ai fuafuaga e le gata i totonu o faiaoga a le Malo, a o lea foi o le a totogi atu ma faiaoga o aoga a Ekalesia. O le mea lea o lea e fesili atu ai ma le faaaloalo po o le vaegatupe lea o le a aofia uma atu ai lava ma totogi o faiaoga a Ekalesia, ae pe a foi ma private schools, aua e i ai foi mea o private schools o lo o i ai i totonu o le atunuu, pe ua oo i ai se fuafuaga a le tatou Malo i lenei tulaga.

E talitonu lava o le tulaga i mea tau tupe mo taaloga. Tasi lea tulaga po o se vaega taua o le atunuu na sausaunoa i ai nisi o sui usufono e taua tele mea o taaloga, aemaise lava mea o taaloga ia e mafai ona oo atu i le professional level, e maua ai tupe pe a maua avanoa e taaalo ai i atunuu i fafo, agai atu i fafo. O lea la e maua o lea o lo o i ai fesoasoani ia mai le tatou Malo mai le Ofisa o le SIFA faapea foi isi ofisa ia e maua ai tupe, o lea lava o lo o faasafua e le gata i taaloga ia i le auina atu o le au taaalo i fafo, ae faapea foi le atinaeina o taaloga eseese i Samoa nei. Ae malo faafetai, o le tulaga lea o lo o manaomia, o le matua atiae o vaega eseese ia i totonu o le tatou atunuu.

O le fesili i le tatou taligamalo. E i ai fonotaga tetele ia e loma nei, o le fonotaga a le CHOKA ma le fonotaga lea a le ACPEU e i ai ma le IEPA, ia po o le a se tapenaga ua i ai i fonotaga, e ese le taua o nei fonotaga, aemaise lava le fonotaga lea a le ACPEU o lea e fuafua e sainsi ai ma le feagaiga e faaoga ai le igoa o Samoa. O le tulaga lea lea e pei e faafesili atu ai, ia po o i ai se isi suiga ua i ai, po o i ai se isi fuafuaga ona o le faamai o le Koviti-19 po o lea lava o lo o sologa lelei tapenaga mo lea vaega ona o lea e matau atu o lo o i ai tupe faaagaaga mo fonotaga ia i totonu o le Tala o le Tupe.

O le tatou vaega o sikolasipi a le Malo, o lea ua matau o lea ua sii mai i le PSC. Ia atonu o se faiga lelei foi lea faiga, sui mai i i le Matagaluega e aumai i ai tatou sikolasipi ia e fesoasoani ai mo tamaiti e lima vaivai o latou aiga, ia maua pea avanoa e aooga ai. Ia ae pei foi ona saunoa se tasi o sui usufono, e i ai se avanoa foi lea e maua ai se fesoasoani mo isi tamaiti e le maua ni sikolasipi aemaise lava le tatou NUS aua e pei lava ona silafia, e fai lava sina taugata o tatou pili i le tatou Iunivesite Aoao, ae se i silasila ane i ai.

E i ai lou taofi e le o lava le seleni lea e faaagaaga mo le legal aid, le Matagaluega o Faamasinoga. Aua o lea e matauina, o lo o siisii pea i luga latou solitulafono. A onei lava ituaiga mataupu e tataua lava ona o gatusa lelei ma o faatasi ma polokalame ina ia toe fuataina ai le olaga o latou ia solitulafono. A o le mea la lea e matauina i lou sui usufono, o lo o faatuputupulaia pea le fuainumera o latou solitulafono ma le tele o isi mau solitulafono. E oo lava i mea ia o taavale lavevea ua matua tele masalo ua le asa lava se aso ma se taavale lavea, ae maumau ai foi ma soifua. Ae se i silasila ane i lona tulaga, e manaomia le tuutuu i luga le seleni o le tatou legal aid ina ia lelei ma avanoa le tele o nisi o loia e tutu mo latou e solitulafono.

E i ai foi le polokalame fou lea ua matauina, le community law centre, e le fou i le tulaga foi lele faapea faatoa matauina lea, a ua leva ona faatalanoa, ae o lea la ou te vaai atu o lo o i ai tupe faaagaaga mo le faamoemoe lea. E fia malamalama lou sui usufono po o le a le faatautaiga o le faamoemoe lea, po o fea e faatu ai le ofisa, a o le a le tulaga foi lea o tagata galulue ai i totonu o le ofisa lea. O le a tonu le latou matafaioi ma le latou auunaga, pe fai mo tagata, ae pe totogi foi se tupe.

O le tatou vaega lea o le... e i ai le vaegatupe lea e faaagaaga mai i le Matagaluega o Faamasinoga mo le fuaina o tuaoi o fanua faaleaganuu. E fia fesili atu i lau Afioga i le Minisita po o le a tonu lava lea polokalame, po o se mea foi lea e fai i le Faamasinoga o Fanua ma Suafa po o le a le tulaga lea e faaoga ai tupe ia, aua o lea e aumai i i mo le fuaina o tuaoi o fanua faaleaganuu. Ae afai foi la e mafua ona o faamasinoga ia i le Faamasinoga o Fanua ma Suafa, ia po o se vaegatupe foi lea e talosaga ai tagata ia e fai a latou faamasinoga e fia fua tuaoi o latou fanua. Aua o lea foi sa i ai tulaga ma faamoemoega faapena i totonu o le tulafono, ina ia faigofie ma fesoasoani foi i alii ma

tamaitai faamasino, i le fuaina o tuaoi. Ae aua le toe o i le mea foi lele e tuaoi i le niu tuaoi i le mago ma le a noa. Ae matuai fua lelei ia tuaoi ma faapine lelei, ona manino lea ma leai se feeseaiga e toe tulai mai i le lumanai.

O lo o i ai foi le tulaga lea e tulai mai e pei e tei ai le vaai. O le tuueseina o le Judiciary, e na o le pau lena o le upu lea e i i, e le o malamalama po o le a le uiga tonu, o le faamoemoe lea e i ai. Po o le tuueseina o Faamasinoga Solitulafono mai Faamasinoga o Fanua ma Suafa. Po o le tuueseina o Faamasinoga Solitulafono mai Faamasinoga tau le va o tagata, Civil courts ma Criminal Court. Po o le a le tuueseesega lea e tuuese i ai ia le Judiciary. E pei o le vaega lea e fia fesili ai e fia malamalama i le tulaga lena.

O le tatou Custom ma le Revenue. O lea ou te le o toe faalogo atu pe o ou toe iloa, po o le a le mea ua oo i ai le TIMS, po o le a le tulaga ua i ai le faamoemoe o le TIMS. O le TIMS ua gase atu po o le a le tulaga ua i ai, pe faaauau pe i ai se taimi se i toe tilotilo i ai. Ua matauina le tuitiitia le \$2 miliona mai le CSO Community Service Obligation a le Vai ma le EPC. Ona maua ai lea, tuufaatasi le tai \$2 miliona ona maua ai lea o le \$4 miliona. Ona tuu lea i lalo i le LTA faaopoopo i ai le \$4 miliona le tupe lea i lalo o le LTA. Lau Afioga Olo, o lona uiga ona faaatoa ai lea o le \$50 miliona mo atinae ia. E masalo o atinae ia tau le auala ma mea solo e faapena.

E pau lava le mea e fia oo i ai se tala i le tulaga lea lau afioga. O lea o le a aveese nei le vaega lea le \$2 miliona mai le CSO a le EPC, ae o lea foi e taua o le a pau le tau o le eletise. O lea foi o le a le faia se tatou Daylight Saving. Aua o le Daylight Saving o le isi mafuaaga lena o le Daylight Savinga, e sefe ai le suauu ma le eletise. O lona uiga la, o Tesema, e toe o atu le EPC mo se isi tupe e faagaoioi ai le EPC. Ia o mafauaaga e silasila i ai lau Afioga. E faapena atu se manatu.

Le tatou Ofisa o le Fono, malo faafetai. O lea foi e aumai i i la outou separation. Separate, tuueseina o le Ofisa o le Fono. O lea ua tuuese le Faamasinoga Judiciary, tuuese le Ofisa o le Fono, ou te le iloa pe i ai ma nisi mea o toe tuuese. Ae e fia malamalama pe o le a le...faamolemole lau Afioga i le Minisita po o le a le tulaga lea e tuuese ai le Ofisa o le Fono. Aua o lea e i ai tupe faaagaga mo le tuueseina o le Ofisa o le Fono.

E i ai le isi polokalame lea ua ou vaai atu, po o se poloketi. Lalo o le Ofisa o le Fono, o le toe iloiloaina o le tatou Tulafono Faavae po o le Constitutional Review. A fai o le toe iloiloaina o le Tulafono Faavae atoa lava. Ona manatu lea o lou sui, e le o se galuega faigofie le galuega lea, ae le laititi foi le galuega lea o le a alo atu i ai. O le matua tele lava, ae le faigofie foi. E i ai lou talitonuga, aua e le o aumaia e faapea o se Teuteuga o le Faavae. O lea e aumai, o le toe iloiloaina o le Tulafono Faavae atoa, Constitutional Review.

E matautia le tele o le galuega lea ma le taua, e taua tele. Aemaise lona tulaga o le faatalanoaina ma le atunuu, consultation. Aua o le

Tulafono Faavae, this is the Supreme Law o le atunuu. O lona uiga i le faaiuga po o le taunuuga o le galuega lenei. E manaomia se referendum o le atunuu, i lou lea taofi.

O le tulaga lea e pei ona ou fai atu ai, aua e tele mo mea ia ua tatou matauina i le tatou constitution, aemaise o nai masina ua tuanai atu. E tele nai vaega na e pei e tatau ona toe tilotilo lelei i ai. Ae manatua foi, o faamaumauga o taualumaga o le Fono Faavae i le 1960, o lo o manino lava finagalo o tatou tama, o tatou tuua sa i ai i le Fono Faavae. E le faapea o le Tulafono po o Faavae, o le Tulafono Faavae lea ua matua tamauina i le tulaga e i ai. E tu mai pea i augatupulaga fai mai, e silasila i ai latou i o latou taimi po o talafeagai. Ma fai nisi teuteuga po o iloiloga, e po o a nisi vaega faapena e talafeagai e fai i ai.

O le Afioga i le Minisita o le Ofisa o le Loia sili, ua ou vaai atu o tupe e faaagaga e aumai ai se tatou fomai, e suesueina le mafuaaga o maliu, po o se Pathologist. O le fesili po o se Pathologist tumau pe na o se vaitaimi la e aumai ai le tagata lea. Ae o le fesili foi pe o i ai ni tino maliliu i le falemai, o lo o faamoemoe e malaga mai le Pathologist lea e faatino lana galuega mo i latou na. O vaega ia e pei ona fesili atu ai, ia se i silasila ane.

Lau Afioga i le Minisita o Leoleo. Ua leva ona pasia e le tatou Malo, le faatuina o se Police Post, po o se Lala o le Ofisa o Leoleo i afioaga lea o Saluafata i lou itumalo. I le mea tonu lea e i ai malae taaalo kolisi a le itumalo, ma aoga tulagalua. Aepeitai ane, e pei o le Koviti-19 lea na mafua ai ona toloa le faamoemoe lena. Ae pei foi ona silafia e lau afioga. E amata atu lava i Apia agai i le itu lea i Sasae, e faatoa maua lava le isi Police Post i Lalomanu. O lenei lava vaitau aemaise lava le faatupulaia o numera o taavale afi lea e feoai i luga o aualatetele. Ma ua tele foi le mau faalavelave e tulai mai. Atonu o i ina tonu lava se vaega e tatau ona faatu ai se tatou Ofisa o Leoleo, mo le leoleoina o le tatou aualatele ma isi o latou tiute e pei ona i ai.

Lau Afioga i le Fofoga Fetalai, o le a ou le pai i le \$51 miliona lea e ala ai ona faitioina au e lou itumalo. Aua o lea lava ua pai uma i ai isi sui mamalu. E pau lava le mea, ou te le toe fia talanoa tele i ai. O lea ua manino le tulaga i le mataupu lea.

FOFOGA FETALAI: Pe e te pai pe e te le pai, o lea ua uma ona faamalamalama.

Tofa Hon LAUOFO FONOTOE NUAFESILI PIERRE LAUOFO: E pau lava le mea manino, e leai se \$51 miliona o i ai. E leaga o lou itumalo le isi itumalo o lea sa i ai le roadshow a le Vaega Faaupufai. O lea na mafua ai ona fesilisili mai lou itumalo ia au. I le tatou tupe lea. Ae faafetai o lea e i i le vaega lea o le faatalitali.

Susuga Hon Laauli Leuatea Polataivao Fosi: O le mea e fia faasao lau afioga i le Fofoga Fetalai, si mea laititi lava lea.

FOFOGA FETALAI: Se i tuu atu le avanoa leaga o le Taitaifono.

Susuga Hon Laauli Leuatea Polataivao Fosi: Na ou manatu lava e fai atu se tala analeila, leaga o lea foi sa saunoa Loau i le upu lea. O le a fuainumera na e i totonu i ina? O na e i ai le vaega o le tupe lea. E le o atoa le 51, ona e i ai mafuaaga. O lea e tau faufau faiga faavae e faagaoioi ai le poloketi lea e \$51 miliona. Ä foi na ou fai atu analeila, a na matou omai on time, e omai lava fai loa, aua e lava le taimi e fai ai faiga faavae. E le mafai ona omai ma le \$51 miliona tuu aunoa e aunoa ma ni aiaiga. A o la ua i ai le \$11 miliona lea, e tai \$200,000 a le itumalo, e amata ai faiga faavae e fai ai le poloketi. So it is in there, ae aua le faaseseina le Atunuu. E faapea e le o i ai? E \$11 miliona, o lea ua amata ai le polokalame.

O le faasilasilaga lena ina ne i toe tu ifo foi se isi sui toe faapea mai e le moni. E moni, a na ua i ina, \$11 miliona. O le faasaoga lena. E leaga ou te alofa ia Loau o ia na laga le mataupu. O lea o le a ou tau atu le isi aiaiga o le \$51 miliona lea. O le sui o le FAST na alu i le palota, o ia lena o le taitaifono o le komiti o le \$51 miliona lea. Mo le silafia e le komiti, o le faamalamalama lena. O le lava na auai ma fuafuaga, e ifotonu le fuiniu i le tagata na lalagaina le \$51 miliona o lona itumalo. Ma le faaaloalo.

Afioga Hon Loau Solamalemalo Keneti Sio: E leaga ua tau lou igoa. Faamolemole lava. A e faafofoga lelei lau Afioga a le Fofoga Fetalai, i si au foi agiagi atu, ona o la e faafofoga mai lou itumalo. E le faapea la o au lea ou te le o fiafia, ou te fiafia, a tau sia mea matagofie. Ae ina ia malamalama tagata, e leai se mea o i totonu o le Tala o le tupe. Ia malamalama i ai, e leai se mea. Ae ou te fiafia, o ai a...e matua ou fiafia aua le faamoemoe, olioli ma viia le Alii, pe a faapea...

Susuga Hon Laauli Leuatea Polataivao Fosi: O le mea e fia faamalamalama. Loau o le a le tupe na e i totonu, e fia? E fia le tupe na e i totonu?

Afioga Hon Loau Solamalemalo Keneti Sio: E leai se mea.

Susuga Hon Laauli Leuatea Polataivao Fosi: E \$11 miliona. Se tau pepelo fuafua sole. O le atoaga lena o le \$51 miliona, e tai \$200,000 a le itumalo e amata ai le poloketi. E leaga o la e faalogologo le atunuu, i te i ua faapea mai Samoa e leai se mea. E tai \$200,000 a le 51 itumalo, oi e 50 e le aafia ai Lealailepule.

Susuga Hon Tuilaepa Fatialofa Auelua Sailele Malielegaoi: Lau afioga i le Fofoga Fetalai, pe leai foi se mea e tufa ae ua maona le Atunuu.

FOFOGA FETALAI: Ou te iloa o lea ua malamalama lea tulaga lau afioga i le sui Taitai. O lena lava e i totonu o le Tala o le tupe, atonu e i ai se taimi...

Afioga Hon LAUOFO FONOTOE NUAFESILI PIERRE LAUOFO: Atonu e i ai se taimi. Ae o le fainumera lea e tau o le 51. E le o taua se isi fuainumera, aua e pei o le 51 lava lea sa aumai i tulaga o le faalauiloa, i totonu foi o si o matou itumalo. E mafua ona ou fia pai i ai, ia aua ne i toe fai mai se isi o lou itumalo i lea mea lea. O lea la ua manino, ae o le a ou see ese. A o le mea tonu lea sa tau agai i ai sau tala o aiaiga, o aiaiga o le faaogaina o le tupe. Ae o lea ua vavevave mai le Afioga i le Minisita o Faatoaga. Ae o lea sa ou tau fesili atu i vaega ia..

FOFOGA FETALAI: Malie le sui usufono, se i saunoa mai le Palemia.

Afioga Hon Fiamé Naomi Mataafa: Ai ona o le toatele o le Maota lenei e le i ai i le taimi na tupu ai le mea lea. E masalo e pei na o le susuga ia Tuilaepa. O le tala foi lea i le \$5 lea na amata ai le tatou Iunivesite. Ioe, e tau le \$5 ae tupu mai ai le Iunivesite lapoa. Ia o lea la ua manino. Na faavae le tatou Iunivesite i le \$5, o le a la le isi mea tou te popole ai. O le mea lea e tupu, e le faapea e le tupu.

Afioga Hon LAUOFO FONOTOE NUAFESILI PIERRE LAUOFO: E faafetai lava i lau Afioga i le Palemia. O le a la le mea tatou te le amata ai i le tai \$5 lea.

Afioga Hon Fiamé Naomi Mataafa: Ia ua lelei, amata ai lou itumalo i le \$5.

Afioga Hon LAUOFO FONOTOE NUAFESILI PIERRE LAUOFO: E leai se afaina o le mea lena. Ou te le popole i ai, aua o lea ua ou maua atu i le saunoaga nei a le afioga i le Minisita o Faatoaga. O le tou sui lea na ma tauva o lea e taitai komiti ai i i, i le mea lea. Ae ui i lea, e pau lava le mea o aiaiga.

Aua o lona uiga e i ai aiaiga o le tuuina atu pe ole faamatuuina atu o nai seleni ia. O lona uiga po o ni polokalame foi ia i totonu o itumalo. Se i tautuana, po o ai lea o le a faafoefoeina le mataupu, sei tautuana ne i fai fai foi ae uma ae foi na o sui o le FAST e ave i ai, ae le lavea lenei Vaega. Ae silasila i le aotelega o le faatoaga, o atinae.

Susuga Hon Laauli Leuatea Polataivao Fosi: Lau Afioga i le Fofoga Fetalai, e maua se avanoa faamolemole....

TAPE 26

Susuga Hon Laauli Leuatea Polataivao Fosi: Lau Afioga i le Fofoga Fetalai, pe maua se avanoa faamolemole....

Afioga Hon LAUOFO FONOTOE NUAFESILI PIERRE LAUOFO: o faatoaga, o atinae.

Susuga Hon Laauli Leuatea Polataivao Fosi: E maua se avanoa faamolemole. E le avea le finau umi mai o le sui usufono e matou te le vaai ai i itumalo. Pe lagolago mai pe le lagolago mai le sui, e faaaloalo o la e tapuai mai le atunuu. O tatou lava talasua lea e fai i inei. E leaga e faigata o Samoa e ona mea ia. E faapea ni matou tupe, o tupe a le atunuu. O la ua toe faafoi i ai. Pe tete lava Fonotoe ma Loau, e le afaina, e fai lava mo Sagaga ma Anoamaa.

FOFOGA FETALAI: O le a la le isi mea, o lea foi ua tatala mai le finagalo o le Malo.

Afioga Hon LAUOFO FONOTOE NUAFESILI PIERRE LAUOFO: Lau Afioga i le Fofoga Fetalai, o le a ou toe foi mai i le soifua manuia na ou amata ai ma faauma atu ai loa ma lau lauga.

Ae faafetai, o lea ua ou talanoa atu ai, o le tulaga o le soifua manuia lea e pei ona faaautu ai, e faamuamua ma faataua i le Tala Faatatau Autu o le Tupe. Faafetai o le mea lea o lea e manaomia e le Atunuu. E pei lava ona ou talanoa atu i le amataga o lau folasaga. E tatau ona fesootai le soifua manuia ma le tulaga o le lelei o le soifuaga e mafua mai i le lelei ma le malosia o le tamaoaiga o le Atunuu. Po o fea la tou te agai i ai, e tatau lava ona tatou vaavaai i le tamaoaiga o le atunuu. Po o le a le tulaga o lo o i ai ina ia siitia ma lelei, faapea foi ona soifua maloloina lelei ma tagata o le Atunuu. O le tulaga lea e manaomia ai...aemaise a la a tatou atinae, o lelei foi o le tamaoaiga ma tele o atinae. Atinae tetele, atinae tetele o lo o maua ai avanoa faigaluega. Aua o le mea lena e manaomia, o tupe, ma fesoasoani foi i le tele o pisinisi laiti.

Aua o le tulaga la lea, e le o po se lilo o lea foi e sau i le faalogo. O lea ua taofi isi a tatou atinae tetele. E pei o le flea maketi lea foi sa taua e le Afioga ia Lautafi. Po o le a se faamalamalamaga o ia tulaga. O le tatou malaevaalele i Tiavea ua taofi. O le tatou fale fogafalelima ua taofi. O le tatou uafu i Vaiusu ua taofi. O le Daylight ua taofi, ma nisi mea. A o mea ia sa faamoemoe e maua ai nai avanoa faigaluega mo nai o tatou tagata o lo o manaomai seleni.

Lau Afioga i le Fofoga Fetalai, ua ...

Tofa Olo Fiti Afoa Vaai: Lau Afioga i le Fofoga Fetalai, na o si na mea e fia faasao

FOFOGA FETALAI: Onosai mai le sui mamalu.

Tofa Olo Fiti Afoa Vaai: E faafetai lava o lea ua laulau mai e le Afioga i le Sui Taitai o le Itu Agai le tulaga o mea e taofi. Ioe, na o le toso lava o taofilima o mea ia. Leaga e moni e aoga, ae o le silasila ia a lo tatou Malo, e i ai lava mea e ave i ai le faamuamua. O le tele ia o mea e ave i ai le faamuamua pe a ou tago e laulau atu. Aemaise lava o lo o afifo ma papaaao ai le Atunuu i ni atinae, i le saogalemu o le Atunuu ma le faiga o le tamaoiga o le Atunuu. A o mea ia e faamulimuli mai. E mo le silafia e lau Afioga o tatou atinae na e tai pei o le malaevaalele la e i tua le small airport la e i tua. O la ua toso lelei lava le taofilima se i fai sana malologa mo lenei taimi.

FOFOGA FETALAI: Ia faauma maia le saunoaga a le sui mamalu, lau Afioga i le sui Taitai.

Afioga Hon LAUOFO FONOTOE NUA FESILI PIERRE LAUOFO: Lau afioga faafetai. Sa saunoa lou uso a sui usufono ia Loau, foi i le faafetai i le Atua, i le fiafia ina ua manuia lana faamasinoga. O lea lava sa faafofoga le Maota, e le faigofie foi ia mea. O lena foi e silafia e lau Afioga i le Fofoga Fetalai, aua o lau susuga foi o le loia, e te silafia foi tulaga o faamasinoga ma mea faapena, e le faigofie. O lea la sa ae manuia lana taumafaiga. Ae na muamua manuia lau taumafaiga.

Aua na amata faamasinoga, na faasolo faamasinoga. Ou vaai atu ia Loau, sole, na o le faiaina, faiaina, faiaina. E faiaina faatolu ae o lea lava o le a oo mai ia au. Ona fai mai a lea o si ou uso, lototele, alu e taumafai. O lea la na taumafai. O au la na muamua malo, ae mulimuli mai lou uso, mulimuli malo lou uso. O le taimi la lea na ou malo ai. Oi, lau Afioga i le Fofoga Fetalai, ina ua ou taunuu mai i Petesa, se pei o le siamupini o le lalolagi lea ua mai. E matautia, e matautia se lagona foi lele. O lea la na ou faamalosiau i lou uso, ina ua oo mai lona taimi, ou fai atu, alu i ai, aua e te foi. Aua e te popole, ua e iloa foi le paga mamafa o le lalolagi, e fa (4) fusi e le na o le tasi. E tasi la lea ia au, ae alu oe e taumafai mai le isi fusi. O lea la ua malo si ou uso, malo e le faigofie ia mea.

Ae mo le agai i luma, na mafua ona fai lau tala, aua o lea foi ou te vaai atu e i ai le teuteuga o le tulafono o faiga palota ia, e masalo e sosoo pe a maea le Tala o le tupe.

E tasi lea mea ua tatau ona silasila i ai, o lea ou te alu atu i le lauga faalauaitetele i le tala o le tupe. Se i silasila i ai, i le faiga e tuu ai loa ia mea e aua le toe faia. E tatau ona silasila loa ina ia faataga se vaegatupe a le sui tauva lava ia, e alu e faaaoga, e faaaoga e fai ai lana palota. Pe \$30,000 pe fia. O se mea talafeagai ia aua ai ne i toe faia ni sue, pe a uma mai faiga palota. A ia tatala loa lea vaega ina ia faigofie ai, ma aua la ne i toe... ma aveese ai ma lea mea o le corrupt practice list. Ma lena

mea, e le taofia ai le sui mo se lima (5) tausaga. Ae tatala le avanoa ina ia, ...ae fai le lipoti, e alu ma ave le lipoti i le Ofisa o Faiga Palota, i le komesina, e lipoti i ai tupe ia e faaoga i le taumafaiga o le palota.

E faaiu atu ai lea e faapea, ou te faafetai i lou itumalo, faafetai foi i lau puleto o lea foi ua ou toe seei i lo tatou Nofoa i lenei foi Paeaiga. Ua faamalo faafetai. E talia lava foi ma le fiafia la outou faaeaea. O la outou faaaloalo lea ua toe fai ai au po o lou foi faatauvaa ma auauna a lo tatou itumalo mo le isi lima tausaga. A to manatu i tua, o le Paeaiga lona X111 lea sa outou filifilia ai lou tagata, o lenei ua tatou Paeaiga lona XV11. Malo faafetai.

Lau Afioga i le Fofoga Fetalai, e momoli atu lau faafetai tele i lau Afioga. Na ou ulufale mai i le Paeaiga lona X111, ioe, o ai na iluilu ma talutalu o au le isi sui usufono na muamua faatauto i le Maota fou nei. E ese le manaia. E faafetai i lau afioga mo le avanoa na faatautoina ai matou. E ese le mamalu a o le fou ma le matagofie o le Maota fou. O le galuega sa faamaite mea ai le Afioga ia Laauli. A o tulai ma seei i le Nofolii o le Nofoa o le Fofoga Fetalai. O lea la ua faatauto, ia malo, faafetai mo lea tulaga na tulai mai i le Aso Faraile. Ua ta mitamita lava ua tusi ai lo ta igoa o ita le isi sui muamua faatauto i totonu o lenei Maota.

Lau Afioga i le fofoga Fetalai, ia agalelei le Atua i lou soifua, faamanuia ia te oe, i lou seei mai e tauave le Nofoa o le Fonousu a le Atunuu i lenei foi lima tausaga. Ia faapena ona alofagia e le Atua lou soifua, e le gata i le tino, a ia faasilisili ai lou agaga.

Ia faapea foi le afioga i le Palemia, o ou mama na, le sui Palemia ma le Kapeneta ma lena Itu o le Maota. Ia sagai ane ai o le tai ia manuia foi outou faia.

Ia faapea foi i lenei Itu o le Malu, alofagia e le Atua le soifua o le Taitai o le Itu Agai, maua foi sona malosi faapea foi le tofa e taitai ai lenei Itu, ia faapea foi sui mamalu uma. Aua o tulaga lava masani, i lau matau i totonu o le Maota lenei, a malosi a le agai, o le lelei foi lena o le Malo.

O le matou faamatalaga lea, agalelei le Atua i toega o le fonu o lenei aso, ae ou malolo atu i le alofa ma le agalelei o le Atua. Soifua.

Na faaalua le agaga fiafia o le Maota i le patipati o latou aao i le maea ai o le Saunoaga a le sui usufono mo Anoamaa 2.

FOFOGA FETALAI: Ua faamalo faafetai i le saunoaga faaumiumi a lau Afioga i le sui Taitai o le Itu Agai. O lea foi ua matou faalogologo ma le totoa, ua tele foi lou faasoa mai i nisi foi o mea taua. Atonu foi o lea ua faafogafoga mai le Palemia ma le Kapeneta, o lea foi ua e faasoa mai i le tele o mea e manaomia i le tatou Tala o le tupe. O le mea lea faamalo faafetai. E talitonu lava o lea ua aumai le sao aemaise foi o le itumalo aemaise foi o le Atunuu atoa.

A o le tau faafetai mai i le tautoga, ia viia le Atua. O le mea e pitosili ona taua, o lea tou te tauto i le Atua ae le o le Maota.

O le mea lea, measili faafetai o lea ua tatou feiloai, o le taua lena. O le mea foi lena o lea na tufa atu ai a outou Tusi Paia, leaga o lea sa outou tauto i le Atua, ma avatu Tusi Paia ma outou.

O le mea lea, talu ai ua ou vaai ua lalata i le taimi o le tatou malologa, ae toe o le Taitai o le Itu Agai lea e faamoemoe e.. e i ai le manatu se i o tatou toe taliu mai i le itula e 7:00 ona tuua atu lea i le Taitai e fai mai lana saunoaga ona faaauau ai lea o le tatou galuega.

Ou te faasilasila atu ua faataatiaese nei Tualumaga o le Fono Aoa o Faitulafono mo lona malologa ona toe tauaofia ai lea, i le itula e 7:00 i le afiafi.

Na faataatiaese Galuega a le Fono Aoa o Faitulafono i le itula e 5:51 i le afiafi ma toe faaauau i le itula e 6:58 i le afiafi.